

OPUNVKV-HERV

# CANE COYVTE.

---

## SETENTVCKE 1.

Hvteceskv omof Opunvkvtates, momen *mv* Opunvkvt Hesaketvmesen vpakvtes, momen *mv* Opunvkvt Hesaketvmese tates.

2 Hvteceskv omof matvwvt Hesaketvmesen vpakvtes.

3 Nanvke omvlkvn mvt hayvtes: momen mvt sekate *mv* hakvte hvmkis hakekates.

4 Mv ofvn hesaketv ocvtes: momen *mv* hesaketvt este en hvyayvke tates.

5 Momen hvyayvket yomuckofvn hvyayakes; momen yomuckatet kerrekates.

6 Hesaketvmese atotet, hunvnwvt, Cane hocefket, huervtes.

7 Matvwvt ohkerkuecvt vlaket omvtes, Hvyayvke ohkerkuecvranatet, *mv* eteropotten *este* omvlkvt vkv-svmvkren.

8 Mv Hvyayvke tokates, momis *mv* Hvyayvke ohkerkuecvranatet *vlakvtes*.

9 Mvt Hvyayvke mehenwet, ekvnvn vlaket este vtekat ohhvyayicat tates.

10 Ekvnyv arvtes, momet ekvnvn hayet omvtes, momen ekvnvt kerrekates.

11 Enaken em vlakan, enaket evpayvkekates.

12 Momis estomomuset evpayakat, mv e hocefkv oh vksvsmakat, Hesaketvmeso e'ppucetake hakvkepvren yekcetvn e'mvtes:

13 Mv catv es heckat tokon, monkat enavpeswv komat tokon, monkat este komat tokon, momis Hesaketvmese *es heckaten.*

14 Momen Opunvkvt enavpeswv hakvtes, momet, herkv mchenwvu es fvcket, epu 'paket aremvts, (momen en rakke hvmkuse Erke heckuecvte en rakke omēn hecēmvts.)

15 Canet mvn ohkerkuecet, huehkytes, Heyvt my tvnkes, Cv yupv vlakat vn homahtv hakes, make opunv- yecvyyvnke, cv homv tatet ok.

16 Momen cs em fvcketv, herkvn hvtvm herkvn, omvl- keyatet pun heckvtes.

17 Vhakv Moses etehoyvnen *Hesaketvmeset* estemen, herkv mehenwv esyomat Cesvs Klist etehoyvnen vlakv- tet ok.

18 Este estomet estofvn Hesaketvmese hecvte sekos; Eppuce hvmkuse heckuecvtet, Erke e hokpe vpikat, mvt ohkerkuecvtes.

19 Momen Celuslvme aenkvpvke Plestvlke Lefitvlke esyome, Estimv toyetske haks? kicake em 'pohkvrvane Cusvlke ohtotakof, heyvt Cane em ohkerkueckv tes.

20 Momen ehelaksecekot, e ohkerkuecvtes; momet e ohkerkuecet, Klist toyvkos, *makvtes.*

21 Momen, Naket o haks, monkv? *kicaket* em 'pohakv- tes. Elivs toyetskvh? Mv toyvkos, makvtes. Mv Owalv toyetskvh? *kicakvtes.* Momen, Hekos, *maket em* vyoposkvetes.

22 Momof, Estimv toyetske haks? a pu 'totakan em onvyeyvren. Cemc ec ohfvccv naken maketske haks? *kicakvtes.*

23 Opunvkv en haket vnrwwvn huehke, Hesaketvmese

em vyetv lvpotken hayvkes, makat toyis, owalv Esivs makvte vcvkvyen, makvtes.

24 Momen mv vtotvkhoyat Falvsevlke tates.

25 Momen, Monkv, Klist, monkat Eliv . monkat mv Owalv toyetskekcon omat, estoman paptisetske haks ? kicet, em 'pohakvtes.

26 Canet em vyoposket, Uewvn es paptisit omis : momis hvmket kerratskekot ece 'pakvket hueres ;

27 Cv yupv vlake vn homahtv hakat, mvt mv tes, mv em estelepikv sohwvnakv en recopvye taye heretv orvkat.

28 Heyv nanvke, Cotvne tvpalv Perepelvn, Cane paptisan momaket omvtes.

29 Rempvkse Cesvs em vlaken Canet hecet, Hecvkes, Hesaketvmese en Yvpefikuce holwvyeckv ekvnv enkvpi- cat ! makvtes.

30 Heyvt mv tes, Cv yupvn hunvnwv vlaket vn homahtv hakes, opunvyecit makvynke ; cv homv tatet ok.

31 Momen kerrvkvnkes : momis Eslevl em ohkerkvren uewvn es paptisit vlakit omis.

32 Momen ohkerkuecet, Puyvfekcvt pvce-howe omēt hylwen a hvtapket, oh fekhonnen hecvyvnkes.

33 Momet kerrvkvnkes ; momis mv, Uewv es paptisvs, *cv kice vc vtovtet*, Estimvn Puyvfekcvt hvtapket oh fekhonnen hecetskat, mvt mv tes, Puyvfekcv Vcakat es paptisat, cv kicvnkes.

34 Momen hecit, Heyvt Hesaketvmese E'ppuce tes, *makit* kerkuecvyvnks, Canet makvtes.

35 Hvtvm rempvkse Cane en kerrepvlke hokkolen esyomet svpaktvtes :

36 Momet Cesvs yvkapen hecet, Hecvkes, Hesaketvmese en Yvpefikuce ! makvtes.

37 Momen en kerrepvlke hokkolat opunayat pohaket, Cesvs vcvkvhoyvtes.

38 Momof Cesvs a fulotiket, vcvkvhoyen hecvtes, momet, Naken hopoyatske haks? kicvtes. Momen, Lapi, (mv oh yvtekhoyat, Mvhayv maketvt omen,) Estymvn liketska? makakvtes.

39 Vthoyet, hecvkes, kicvtes. Vthohyet, estvn likat hecakvtes, momet mv nettv em fekhonuvkepvtes, hvse-vkerky espalat mahet ok.

40 Cane *opunaye* pohahke vcvkvhoyvte hvmkat, Simv Petv etecakkat, Vntolu tates.

41 Etecakkat mahusat Simv taten eshecvtes, momen, Mesiv eshēcēs, kicvtes; mv ohyvtekhoyat Klist tes.

42 Momet Cesvs 'sem vlakvtes: momen Cesvs hecof, Simv Convse e'ppuce toyetskes: Sefvs ce kihocvres, kicvtes, mv ohyvtekhoyat, Cvto, maketvt omes.

43 Rempvkse Cesvs Kalvlen vyetvn komvtes, momet Felvpen eshecet, Vc vcvkvtes, kicvtes.

44 Momen Felvpe Persitv, Vntolu Petv tepakat eme tvlofv, aosse tates.

45 Momen Felvpe Neranevl eshecet, Moset vhaky ofv *opunvyece coyvte*, momen ovalvlke opunvyece coyakvte, Cesvs Nasvlvlke, Cose e'ppuce eshēcēs, kicvtes.

46 Momen Neranevl, Nake heret Nasvlen aosse taye hakes? makvtes. Vhtet, hecvs, Felvpet kicvtes.

47 Cesvs Neranevl em vlaken hecvtes, momet, Hecvkes, Eslevlke mehenwe, mv ofv mvkerretv sekat! makvtes.

48 Neranevl, Estymv vten cv kerretska? kicvtes. Cesvs em vyoposket, Felvpe ce'nhuehkeko munken, ke-rakko em vpe elecv liketskof, ce hecvyis, kicvtes.

49 Neranevl em vyoposket, Mvhaya, Hesaketvmese E'ppuce toyetskes; Eslevl em Mekko toyetskes, kicvtes.

50 Cesvs em vyoposket, Ke-rakko em vpe elecvn ce hecvyis, ce kihcikv vkvsametska? Heyv nanvke 'sen rakrvken hecetkvres, kicvtes.

51 Momet, Mehenwvn, Mehenwvn ce kicis, Heyv eryupv hvlwat en hauken *hecet*, este E'chuswv onvpvn Heskvetvmese em encelvlket acemecet momet hvtppecen hecetskvres, kicvtes.

### SETENTVCCKE 2.

MOMEN nettv resvtutceenan etepvyetvt ocvtes, Keny *tvlofn* Kalvle *ekvnvn*; momen Cesvs e'cket mvn arvtes:

2 Momen Cesvs en kerrepvlke esyoman *mv* etepvyetvn enhuehhokvtes.

3 Momen pvrko-opuswvt orekon, Pvrko-opuswvn ocvkekos, Cesvn e'cket kicvtes.

4 Momen, Hokte, naken etem oceya? hvse-vkerkv cvnaket hkte vlvkekos, Cesvs kicvtes.

5 Naket o estomen ce kievkis, momecvks, e'cket vtotkvlken kicvtes.

6 Momen Cusvlke es en hvschteckv *vcvkvyet* cvto ue-emvrkvswv faken hokkole monkat tutcene *vcvnke* vlken mvn vpohoyvtes.

7 Ueemvrkvswvn uewvn fvcfickks, Cesvs kicakvtes. Momen cukfvlvww vteken fvcfickakvtes.

8 Mucv svkcahwet, hompetv-rakko em evpayvn es em vpeyvkes, kicakvtes. Momen es em vpeyakvtes.

9 Hompetv-rakko em evpayv *mv* uewv pvrko-opuswv hakat *lasvtes*, momis estvmvn vtē tat kerrekates, (momis vtotkvlke uewv cvwakat kerrakvtes); lahsof, hompetv-rakko em evpayvt hokte epayvranan enhuehkvties,

10 Momet, Hvte vlicecof, este vtekat pvrko-opuswv heren a'slicen, em etetayen eskakof, 'sen holwvkusen aslicvnts; momis cemet pvrko-opuswv heran vcayecetsken, hiyomat ores, kicvtes.

11 Heyv nakeskerkv enhvteceskv Cesvs Kalvle *ekvnv*

Kenv *tvlofn* momecat, en rakke heckuecvtes; momen en kerrepvlke oh *vkvsymakvtes*.

12 Heyv eryupv *Kvpnevñ* vkhvtapkvtes, eme, e'cke, etecakkakat, momen en kerrepvlkeu: momet nettv sulkekon mvn fekhonnakvtes.

13 Momen Cusvlke em ohhoynkvvt vwolice tates; momen Cesvs Celuslvmen ayvtes,

14 Momet cuko-vcakat ofvn wakv, yvpefikv pvcехowe esyome wiyyakat, momen tokunawv esyoposkvlke vpoken hecvtes:

15 Momet afushunuke vnvcomen estepketvn es hahyof, omvlkvñ cuko-vcakan sossicvtes, yvpefikv wakv svpvken; momet esyoposkvlke en tokunawv a em pvlatet, ohhom petv cektulcccvtes;

16 Momet pvcехowe wiyyakan, Yv nanvken vkuehuecvkes; Cv'rke en cuko neskvcuko hahyatskvs, kicakvtes.

17 Momen, Cen cuko vyvkhvmketv cv lokes, *make* cokat en kerrepvlket vkerricakytes.

18 Momof Cusvlket em vyoposket, Heyv nanvke momecetskat eskerkv estomen pu hecvkuecetske haks? kicakvtes.

19 Cesvs em vyoposket, Heyv cuko-vcakat sumecicvkes, momen nettv tutcenen akvwvpares, kicvtes.

20 Ohrolope pale-osten epohkaken heyy cuko-vcakat etohtvrhoystes, moman cemet nettv tutcenen akvwwapetskvr haks? Cusvlket makakytes.

21 Momis e'na en cuko-vcakan opunvyecet okvtes.

22 Momekv pvsatkan enkvpvket akvwvpikof, en kerrepvlke heyy kicvte vkerricakytes; momet Cokat momen opunvkv Cesvs makvten *vkvsymakvtes*.

23 Momen Celuslvmen ohhoynkv hompetv-rakkon aret, estet nakeskerkvñ momecen hecakof, sulket e hocefkvñ oh *vkvsymakvtes*.

- 24 Momis Cesvs em e wikekates, *este* omvlkvñ kerreky;  
 25 Momet estimvt este ohkerkuecvre enkusvpkekates;  
 este nake vpikat kerreky.

### SETENTVCKE 3.

FALVSEVLKET este-hunvnwv, Nekotemvse hocefket, Cu-  
 sylke semevpayvt huervtes.

2 Mvt neren Cesvs em vlaket, Lapi, mvhayv Hesaketv-  
 mese aenkvpvke toyetskat kerrēs; heyy nanvke eskerkv  
 momecetskat este momeceko tayet okv, Hesaketvmeset  
 vpvket omekon omat, kicvtes.

3 Cesvs em vyoposket, Mehenwvn, mehenwvn ce kicis,  
 Estet svnvcomvn heckekon omat, Hesaketvmese em  
 ohmekketv heceko tayes, kicvtes.

4 Este vculehpof, estomet hecke taye haks? svhokkolv  
 e'cke e nvrken ecehyet, hecke taye haks? Nekotemvset  
 kicvtes.

5 Cesvs em vyoposket, Mehenwvn, mehenwvn ce kicis,  
 Este uewv Puyvfekcvn tepakan es hecket omekon omat,  
 Hesaketvmese em ohmekketv eceyeko tayet os.

6 Enavpeswv es heckat enavpeswt omen, puyvfekcv  
 es heckat puyvfekcvt omes.

7 Estomahes kohmetskvs, Svnvcomv heckvranatsket os,  
 ce kicvyat.

8 Hotvle estvmvn komat hotales, momen en hake po-  
 hetskes, momis estvmvn vtet ot, estvmvn ayet omat  
 kerretskekos; mv omēt os, Puyvfekcv es heckat vté-  
 kat.

9 Nekotemvset em vyoposket, Heyv nanvke estomet  
 mome taye haks? kicvtes.

10 Cesvs em vyoposket, kicvtes, Eslevlke em mvhayvt  
 omat, heyy nanvke kerretskeko haks?

11 Mehenwvn, mehenwvn ce kicis, Mv nake kerreyat  
 Muskokee N. T. 17

opunahoyes, nomen mv nako heceyvtet akerkuecēs, momen akerkuecēyan pum esatskekos.

12 Ekvny nanvken cem onayvkvyvten vksamatskekon omat, hvlwe nanvken cem onayvkvyat estomet vksamatskvr haks?

13 Momen este estomet hvlwe tvlofv vkwvpkvtē sekos, mv hvlwe tvlofv ahvtvpkvtē, este E'chuswv hvlwe tvlofv likat, *vkwvpkekaten* omat.

14 Momen Moses vñrvwwn cetto kwwapvtē etvpomet este E'chuswv kwwvpkvrānet os :

15 Estimvt o estomet oh vksamat estemerkekot, hesaketv yuksv-sekon ocvren.

16 Hesaketvmese ekvny vnokece mahat hiyomen orvtet omekv : E'ppuce hvmkuse hecknecvte emvtes, mvn estimvt o estomet oh vksamat estemerkekot, hesaketv yuksvsekon ocvren.

17 Hesaketvmeset E'ppuce ekvny ohfvccecvren ekvnvn a ohtotet omekot, momis mv eteropotten ekvnyt hesakvren *vtotvtet omekv*.

18 Mv oh vksamat ohfvcceket os ; momis mv oh vksvmekat ohfvcce hoynet os, Hesaketvmese E'ppuce hvmkuse heckuecvte hocefknv oh vksvmekoky.

19 Momen heyvt ohfvcceckv tes ; hvyayvket ekvnvn vlvkes, momis estet yomucken hvyayvke emuntvlen vnokecvktet omes, em vtotketv holwhoket omekv.

20 Holwvke momecat vtekat hvyayvke en homecet, hvyayvke oh vtekot os, em vtotketv ohkerkykekaren.

21 Momis fvccetv momecat hvyayvke oh ates, em vtotketv Hesaketvmese eferopotten vtotkvktē tat kerkyke hakvren.

22 Heyv nanvke renyupv Cesvs en kerrepvlken esyomet Cutev ekvnvn yicvtes ; momen vpaket mvn fekhonnet, paptisvtes.

23 Momen Caneu paptisvtes, Envn, Selem tempen, mvn uewvt tayet omekv : momen en yicet, paptiskakvtes.

24 Cane cuko-yekcv hvte vpihokeko emunkekv.

25 Momof nake vpohkvt kwwvpkvtes, hvschteckv oh-fvccvn, Cane en kerrepvlke momet Cusvlke em etenrvwvn.

26 Momen Canen en yicet, Lapi, mv Cotvne typalv ece 'pakvnke, ohkerkuecetskat, heevs, mvt paptisen, *este* omvlkvt en yices ; kicakvtes.

27 Cane vyoposket, Este naket en hecikekos, hvlwe tvlofv a e'mhoyekon omat, makvtes.

28 Ceme etvwvt a vn kerrvlke toyatskes, Klist toyvkos, momis ehomv ve vtothoyes, makvyvte.

29 Mv ehiwv taranat ocat hokte-epayvranat tes ; momis mv hokte-epayvranat en hessel hueret, pohof afvcketvn es afvckes, hokte-epayvranat em opunvkv en hake svrah-kvn ; momēt omekv heyy vñ afvcketv esfvckes.

30 Emet ohvtvlkvranes, momis vnet cv yokopvranet os.

31 Hvlwe atatet omvlkvn ohfvnket os ; estimvt ekvnv enaket on omat, ekvnvlket omet, ekvnv opunvyecet omes ; hvlwe tvlofv atatet omvlkvn ohfvnket os.

32 Momen nake hecet, pohtet, mvn kerkuecet os, momis mv kerkuecat estimvt em esekos.

33 Mv kerkuueckv em esat Hesaketvmese mchenwe tat em eskerkv vlicvtet os.

34 Hesaketvmese vtotvte Hesaketvmese em opunvkv opunayet omes : Hesaketvmese Puyvfekcv svkerkekon emet omekv.

35 Erke Eppuce vnokecet ot, nanvke omvlkvn e'nke ofvn wikvtet os.

36 Eppuce oh vkvsamat hesaketv yuksv-sekon ocet os ; momen Eppuce oh vkvsvmekat hesaketv hehcekos : momis Hesaketvmese en cvpvkket oh fekhonnes.

## SETENTVCKE 4.

CANE paptisat 'sensulken Cesvs enkerrepvlken hayet, paptisen Falvsevlket pohan Pucaset kerret okv,

2 (Cesvs emet paptisekon, en kerrepvlket *paptisaket omisem*,)

3 Cutev enkvpaket, hvtvm Kalvlen ayvtes.

4 Momen Semelev ekvnvn 'reteropottvranet omvtes.

5 Momof Semelev tvlofv vlakvtes, Sikv kihocan, ekvnv Cekvpe c'ppuce Cose e'mvte vnakvn.

6 Momen Cekvpe em ueenkorkvt mvn likvtes. Monkv Cesvs ayvtet hotoset omekv, ueenkorkvn oh likvtes; momen hvse-vkerkv esepakat mahe tates.

7 Semelevlke hoktet uewvn ascvwvranet vlakvtes: Esketvn v'mes, Cesvs kicvtes.

8 (En kerrepvlke hompetv nesvranet tvlofvn vpeyvkepet omekv.)

9 Estomēt on Cusvlke toyetskatet esketvn vm 'pohetske haks, Semelevlke hokte toyvyan? Semelevlke hoktet monkv kicvtes; Cusvlke Semelevlke etohkvlketv etem ocekot omekv.

10 Cesvs em vyoposket, Hesaketvmese esteman, momen estimvt, Esketv v'mes, ce kicat kerretsken omat, em 'pohetskvnt omes, momen uewv hesaken ce'mvnt omes, kicvtes.

11 Naken u'escvwetv ocetskekos, momen ueenkorkv sufket oman, estvinv vten mv uewv hesake ocetske haks? hoktet kicvtes.

12 Pu'rke Cekvpe, mv ueenkorkv pu'mvte, momet eme, en hopuetake, momen en wakvlkeu eskakvte, sen rakketsk-  
ket o haks?

13 Cesvs em vyoposket, Heyv uewv eskat vtekat hytvm ewvnhkvrres :

14 Momis estimvt o estomet uewv emvyan eskat estofis

ewvnhekcos, momis *mv* uevv e'mvyat uekiwvt eme ofvn hesaketv yuksv seko vfhne hakvres, kicvtes.

15 Pucasē, heyy uevvn v'mes, cv wvhkekaren, momet ascvwvranet vlvkykaren, hoktet kicvtes.

16 Ahyet, ce'hen 'renhohiket, 'res vlvkvs, Cesvs kicvtes.

17 Hokte vyoposket, Cv'he sahsekos, makvtes. Heren opunahyetskes, Cv'he sahsekos, *maketskat*;

18 Ce'hetake cahkepen ocetskvtet omes, momis hvmke hiyome ocetskat ce'he tokot omekv: mv tat mehenwvn ohketskes, Cesvs kicvtes.

19 Pucasē, owalv toyetskat hecis:

20 Pu'rkvlike heyy ekvnhlwen mekusvpakvtet os: momen Celuslvme *mimvn* este emekusvpvkvranet os, makatsket os, hoktet kicvtes.

21 Cesvs kicvtes, Hoktē, heyyn vm vksvsmvs, heyy ekvnhlwe tokon, momet Celuslvme tokon, Erken vrakkuecvranatskat hvse-vkerky vlakes.

22 Ceme naken *vrakkuecat* kerrekot vrakkuecatskes; pume naken vrakkueceyat kerres; vhesaketv Cusvlke aosset omekv.

23 Momis hvse-vkerky vlvkranet os, momen hiyomat *mv* tes, momof emekusapvlke mehenwakat puyvfekcv momet mehenwetv ofvn Erken vrakkuecvkranat, Erke *mv* omakat vrakkuecvren hopoyet omekv

24 Hesaketvmese Puyvfekcv omes: momen cme emekusvpakat puyvfekcv momet mehenwv ofvn mekusvpkvranet omes.

25 *Momen* Mesiv, Klist kihocat, vlvkranet omén kerris: mvt vlakof, nanvke omvlkvñ pum onayvres, hoktet kicvtes.

26 Vne, cem punayvyat, *mv* toyis, Cesvs kicvtes.

27 Momof en kerrepvlket yicvtes, momet hokte ete'm punayan estomahes komakvtes: momis, Naken hopo-

yetske haks? monkat, Estoman ete'm punayetske haks? estimyt makekates.

28 Momof hokte uescawkv wihket, tvlofn ayepvtes,

29 Momet, Vhwet, este-hunvnwv nake momvyvte omvlkv vñ onayan hecvkes: heyvt Klist. toko haks? hunvntaken kicvtes.

30 Monkv tvlofv asosset, en yicakvtes.

31 Heyv em etenrvwvn en kerrepvlket enkusvpaket, Pucasë, hompvs, kicakvtes.

32 Momis nake hompetv ocepis, ceme kerratskekon, kicvtes.

33 Momekv en kerrepvlket ete'm 'pohaket, Este estomet hompetv 'sem vlahke haks? makakvtes.

34 Cesvs kicakvtes, Vn hompetvt mv a'c vtovten em eyackvn momecit, em vtotketvn esyukpooyvranvyat tes.

35 Hvse ostet vhoske munkes, hiyyo vlvkvrana, makatskeko haks? Hecvkes, ce kicvkis, vfvnnaket cypofvn oh hecvkes: entis naklokce es hathaket omekv.

36 Momen nakloce vteloyat feketv en hecket os, momen em ette hesaketv yuksv-sekon em vteloyet os; fokayat momen vteloyat etepvket afvckvkepvren.

37 Momen heyv ofvn heyv maketv mehenwes, Hvmket fokayen, etvt vteloyes.

38 Oh vtotkatskekate vteloyatskvren ece 'totvkimvts; este etvt vtotkvktet on, em vtotketvn 'sohceyatskes.

39 Momen Semelevlke mv tvlofv vpokat sulket oh vkvsvmakvtes, Nanvke momvyvte omvlkvñ vñ onahyes, hokte make kerkuecat omecicen.

40 Momen Semelevlket en yicet, vpvkvet fekhonnvren em 'pohakvtes; momen nettv hokkolen fekhonnvtes.

41 Momen ohvtvlakat sulket vkvsvmakvtes, eme mahusat em opunvkv omecicen,

42 Momet, Mucv vkvsamës, nake onayetskvte omecice

tolon, momis pume mahusat *opunayat* pohēpēkv, momet, mehenwvn heyvt Klist ekvnv Hesayecvt on kerres, hokten kicakvtes.

43 Momen nettv hokkole renyupvn mvn enkvpaket, Kalvlen oh ayvtes.

44 Cesvs eme mahusat, Owalv em ekvnv ofv vrakketv ocekos, maket kerkuecvtet omekv.

45 Momekv Kalvlen vlakof, Kalvylket, Celuslymen hompetv-rakkon aret, nake momecat omvlkvñ hecakvtet, evpyyakvtes: emeu hompetv-rakko oh vpeyakvtet okv.

46 Momen Cesvs Kalvle *ekvnv* Kenv *tvlofn* hvtvm vlakytes, mv ueww pvrko-opuswv hayvtet. Momen evpayv hvnket mvn arvtes, e'ppucet enokket Kvpvnevn wakken.

47 Cesvs Cutev ekvnvn aosiyet, Kalvlen vlakan pohof, oh ayvtes, momet a vk hvtapket, e'ppucen em wicecvren em 'pohvtes; elvranuset omekv.

48 Momof, Nanvke eskerkvñ, momet nake estomahvken hecatskekón omat, vkvsahmatskekos, Cesvt kicvtes.

49 Pucasë, a vk hvtvpkvs, hopueww vñ eleko munken, evpayvt kicvtes.

50 Vyepvs, ce'ppuce hesakes; Cesvs kicvtes. Momen hunvnwv opunvkv Cesvs em punayan vkvsamet, ayepvtes.

51 Momen vk hvtapkof, em vtotkylket vnrapet, Ce'ppuce hesakepes, makaket em onvyakvtes.

52 Momof hvse-vkerkv estofv mahen en here hake vye-cicvten em vpohakvtes. Vpvksvnke, hvse-vkerkv eskolv-pakofvn hepatketv eŋkvpakvnkes, kicakvtes.

53 Momekv hvse-vkerkv matwwv mvketeken, Ce'ppuce hesakes, Cesvs kicet okvnke erket kerrvtcs. Momen eme mahusat vkvsamvtes, momen en cuko somvlkvñ.

54 Cesvs Cutev *ekvnv* enkvpahke Kalvle vlake nakes-kerkv momecat, heyvt esvhokkolat *tates*.

## SETENTVCKE 5.

Heyv nanvke renyupvn Cusvlke en hompetv-rakko hvmket ocvtes; momen Cesvs Celuslvmen ayvtes.

2 Momen Celuslvme yvpefikv *hute* tempen vkhvse Hepluvlke Persity kicakat ocvtes, sohvpetv cahkepe ocet.

3 Heyv ofvn *este* sulke mahet, enokhokvlket, turhecv-kekcat, en yvkvpkv vnyttakat, enatalakat uewv nekeyvrēn emehakaket lumhvtes.

4 Oketyv ocen, encely mv uewv vk hvtapket, uewv melohlicet omekv. Monkv uewv melohilos, estit o estomet homvn vkeeyen omat, enokketv estomen ocvte *tis* cvfekne haket omvtes

5 Momen este-hunvnwv hvmket wakkvtes, enokkvte ohrolvpe pale tutcenen cenvpohkaken.

6 Wakken Cesvs hecof, hofune mahet omen kerret, *Ce* cvfeknvre ce yace haks? kicvtes.

7 Enokkat vyoposket, Pucasse, uewv melohlof vkhvse a'c vkcceyicvre este-hunvnwv ocvks; momis ayvyof, etimvt cv homvn vkhvtapkepet os, *kicvtes*.

8 Ahuyiret, cem pvtakv cahwet, yvkvpvs, Cesvs kicvtes.

9 Momen momat vpakusen este-hunvnwv cvfeknvtes, momet em pvtakv cahwet, yvkvpvtes; momen mv nettv fekvpkv *nettū* tates,

10 Fekvpkv nettv tes: pvtakv sayetskvre cem etektn-kekot os, cvfeknihocan Cusvlket monkv kicavtes.

11 Em vyoposket, Cv cvfeknicatet, Cem pvtakv cahwet, yvkvpvs, cv kihces, kicavtes.

12 Momof em 'pohakat, Hunvnwy estomēt, Cem pvtakv cahwet, yvkvpvs, ce kihce haks? kicavtes.

13 Momen mv cvfeknihocat esti tat kerrekates, mvn este tetayet omen, Cesvs etin ayept omekv.

14 Enyupvn cuko-vcakan Cesvs eshecet, Hects, ce cv-

feknihoces; vnvcomv naoriketskvs, nake 'sen holwvke  
ec oh vlvkekaren, kievtes.

15 Este-hunvnwv enkvpaket, Cesvt cv cvfeknicet os,  
maket, Cusvlken em onvyakytes.

16 Momen monkv Cusvlke Cesvs assecet, elecetv ko-  
makvtes, fekvpkv nettvn yv nanvke momecekv.

17 Momis Cesvs em vyoposket, Cv'rke vtotke munken  
hiyomat orēt os, momen vnet vtotkis, *kicakvtes*.

18 Monkv Cusvlke ohvtvlaken elecetvn komakvtes,  
fekvpkv *nettv* kacat tvlkekot, momis, Hesaketvmeset  
Cv'rke tes, maket, Hesaketvmese etetayen e hayet  
omekv.

19 Monkv Cesvt em vyoposket kicakvtes, Mehenwvn,  
mehenwvn ce kievkis, Eppuce entvlkat naken estomeko  
tayes, momis Erke nake momen hecatet *momecet os*;  
nanvken momecat vtekat, mvn Eppucen matvpomen  
momecet omekv.

20 Erke Eppucen vnokecet, nake momecat omvlkvñ en  
kerkuecet omekv; momet vtotketv heyy 'sen rakrvken  
en kerkuecvres, estomahes komatskvren.

21 Erke pvsatkvt a kvwapet, wenahuecat etvpomen,  
Eppuce estimvn komat wenahuecet omekv

22 Erke npvn ohfvccceckot, momis ohfvccceckv omvlkvñ  
Eppucen em wikvtet omekv :

23 Erke vrakkuecakat etvpomen omvlkvñ Eppuce vrak-  
kuecvkyren. Estimvt Eppucen vrakkuecekon omat,  
vtotvtet Erkeu vrakkuececkot omes.

24 Mehenwvn, mehenwvn ce kievkis, Estit vm punv-  
kvñ pohet, a'c vtotvten oh vkvsamat hesaketv emunkvn  
oces; momet ohfvccceckv hylatkekos, momis elkvn enkv-  
paket hesaketvn tohtvikes.

25 Mehenwvn, mehenwvn ce kievkis, Hvse.vkerkv  
vlakes, momet hiyomat vlvkes, pvsatkat Hesaketvmese

E'ppuce en haken pohkvranat; moinen pohakat weñahokvres.

26 Erke hesaketv eme ofv ocat etvpomen Eppucen hesaketv emeu ofv ocvren e'mvtet omekv.

27 Momet ohfvceckv hayvranateu yekcetvn emvtet omes; este E'chuswvt omekv.

28 Heyv estomahes kohmatskvs, hvse-vkerkv vlaket omekv, mv ofv hopelkv vtehkat omvlkvt en hake pohkvranat,

29 Momet asossvres; here momecakvte hesaketv akvwvpketvn vkwvwpkaken, naorkakvte ohfvceckv akvwvpketvn vkwvwpkvikvres.

30 Vntvlkusat naken momecvko tayes; pohvyatet ohfvceccvyet os; momen vm ohfvceckv fvccvt's, nake komepvyat hopoyct omvkok, momis Erke a'c vtovtve koman.

31 Vnet e ohkerkueccpin omat, vm ohkerkueckv fcekot omes.

32 Hvmket vc ohkerkuecat hueret os, momen mv ker-  
kueckv vc ohkerkuecat mehenwvt on kerris.

33 Cane ohtotatsken, mehenwvn ohkerkuecvtes.

34 Momis este kerkuecat esvkot omes: momis hesahokatskren heyv nanvken makis.

35 Kulke vhetke, hvyayakat omvnkes; momen en hvyayko vhofunekon es afvcketv vkvsvmatske tvnks.

36 Momis Cane en kerkuueckv sen rakken ocis; vtottketv poyvranvye Erke v'mvte, mv vtottketv momecvyat mahusat vc ohkerkuecaket omekv, Erket vc vtovtve tat.

37 Momen Erke vc vtovtet, emet vc ohkerkuecvtet omes. Em opunvkv en hake pohatskvt sekot omet, en heckvu hecatskvt sekot omes.

38 Moinen em opunvkv ece 'pike ocatskekot omes, vtovten oh vkwksamatskekokv.

39 Cokan vketecvks, Mv ofvn hesaketv yuksv-sokon  
ocēs, komatsken, vc ohkerkuccakat mvt omakekv.

40 Momen a'c oh vwetv komatskekot omes, hesaketv  
ocatškvren.

41 Este vc vrakkuecvkvren *enkusvpvkot*, em esvkot  
omes.

42 Momis ce kerrykit, Hesaketvmese em vnokeckv eec  
pike ocatskekot *kerris*.

43 Cv'rke hocefkv ofvn vlakis, momen cv yvpayatske-  
kos; etvt cme e hocefkv ofvn vlaken omat, mvn cvpayats-  
kvres.

44 Estomēt vkvsamatske taye haks, vrakkueckv ete'n  
hopoyepet, vrakkueckv Hesaketvmese tvlkuse aenkv-  
paket hopoyatskekot?

45 Erke ehomv epu'nrvpvres; cv kohmatskvs: hvmket  
cce'nrapvket omes, Moses vfekrakkatske *mahu satet*.

46 Moses vkvsamatskvten omat, vc vkvsamatskvnt os;  
vc opunvyecet hoccicvtet omekv.

47 Momis hoccican vkvsamatskekton omat, estomēt vm  
opunvkvn vkvsmatskvr haks?

### SETENTVCKE 6.

HEYV nanvke renyupvn, Cesvs Kalvle vkhvsen etohtikv-  
tes, *vkhvse* Tipelevs mv tes.

2 Momen este sulke mahet vcvkppeyvtes, enokhokan  
nanvke cskerkvn ohcelayan hecakekv.

3 Momen Cesvs ekvnhvlwe vcemiket, mvn en kerre-  
pvlike vpaket likvtes.

4 Momen ohhoynkv, Cusvlke en hompetv-rakko hvm-  
ket, vwolice tates.

5 Monkv Cesvs vfvnnaket, este sulke mahet a oh awen  
hecof, Tvklike hompvke tayat estvmv vten neseyvr haks?  
Felvpen kicvtes.

6 Momen heyy kicat eskerretvn komat okvtes, eme tat estomvranat kerrepekv.

7 Felvpet em vyoposket, Tvklike tenelyv cukpc hokkole enrahkv tis em etctayahkekos, cōtkuse vlken ehset o estomis, *kicvtes*.

8 En kerrepvlke hvmket, Antolu, Simv Petv etecakkat, *kicvtes*,

9 Cepanet likes, ketinv tvklike-vnore cahkepen, momet rvro lopuckuse hokkolen ocet; momis heyy naket o haks, este sulke momat em etenrvwv?

10 Momen, Este tvk vpoiyvkes, Cesvs kicvtes. Mv mahusat pvhe tayet omekv. Monkv este tvk vpokvtes, em vhonkvtkv cukpe-rakko cahkepat mahet.

11 Momen Cesvs tvklike vnoryke cawvtes, momet ohv-kvsamof, enkerrepvlke vwahlvtes, momen enkerrepvlket tvk vpokan emakvtes; momet rvrou matvpomecvtes, eyacakat vcvkvyen.

12 Momen fvcecvkehpf, En wokucke vhoskan vteloyvkes, naket sumkekaren, en kerrepvlken kicvtes.

13 Monkv etoh vteloyet, ketinv tvklike cahkepvte hompakvten vhoskat en wokucke svmpy palen hokkolohkaken fvcflicakvtes.

14 Momen mv estet Cesvs nakeskerkvn momecen hecafvt, Fvccv mehenwusen heyyt mv Owalv ekvny vlvkrantet os, makavtes.

15 Momen, yekcetvn es ehset, mekko hayetvn komet, yicvranan Cesvs keriyet, entvlkuset ekvnhvwe hvtvm vcemkvtes.

16 Momen yafkof en kerrepvlke vkhvsen vkhvtvpecvtes,

17 Momen perro-cukon vtehiket, vkhvse typalv Kv-pvnevn vfvccvn vpeyvtes. Momen yomuckepen, Cesvs em vlvkekates.

18 Momen hotvle rakke hotalat omecicen, vkhvse melohlvtes.

19 Momen vkerkv tutcenat, monkat ostat mahan kafahkof, Cesvs vkhvse oh yvkapet, perro-cukon vwolicen hecet, penkvlvke tates.

20 Momis, Vne tes ; penkahlatskvs, kicvtes.

21 Momen vksvsmet, perro-cuko a oh ceyicakvtes ; momen moman vpakusen perro-cuko ekvnb vpeyvte er vcakvtes.

22 Enhvyvtke este vkhvse tvpalv svpaklatet, perro-cuko etv sekon, hvmke en kerrepvlke vtehkat tvlken, *hecet*, momet Cesvs perro-cuko vpihet en kerrepvlke vcvkayekon, momis en kerrepvlke entvlkuset vpeyepvten hecakof,

23 (Momis perro-cuko etvt Tipelevs mv Pucase ohkv-same tvklike hompakvte ocat vnakv vwet, yicvtes :)

24 Momen Cesvs momet en kerrepvlkeu sekon este hecakof, emeu perro-cuko vtehiket, Cesvs hopoyet, Kv-pvnevn er oricvtes.

25 Momet vkhvse tvpalv er eshecakat, **Mvhaya**, estofvn yvmvn vlaketskvt haks ? kicakvtes.

26 Cesvs em vyoposket, Mehenwvn, mehenwvn ce kicv-kis, Nakeskerkv hecatskvt omecicen cv hopoyet omats-kekos, momis tvklike hompet, ce cvporvkate omecicen *omatskes*, kicvtes.

27 Hompetv yvmahke tayat em vtotkekot, momis mv hompetv hesaketv emeyuksv-sekat 'oren, *em vtotkvkes*, este E'chuswvt ce'mvkvrana : mvn Erke Hesaketvmeset eskerkuecvtet omekv.

28 Momen, Hesaketvmece em vtotketv vtotkeyvret, naken estomeyvr haks ? kicakvtes.

29 Cesvs em vyoposket, **Mv** atoivten oh vksamatsken omat, mvt Hesaketvmece em vtotketv tes, kicvtes.

30 Momekv, Eskerkv naken heckuecetska, hecēt, oh vkvsvmeye tayat? Naken vtotketske haks?

31 Pu'rkvlke vnrvwwn manvn hompakvtes, Tvklike hompvke tayat hvlwe vten e'makvtes, *maket*, cokat vevkvyen, kicakovtes.

32 Momeń Cesvs *kicat*, Mehenwvn, mehenwvn ce kicv-kis, Mv tvklike hvlwe atat Moses ce'mvkekaret os; momis Cv'rke tvklike mehenwvn hvlwe vten ce'mvket os.

33 Hvlwe a hvtapkaret, hesaketvn ekvnvn ematet Hesaketvmese en tvkliket omekv, kicakovtes.

34 Momof, Pucasē, mv tvklichen estofis pu'mvtcvs, kicakovtes.

35 Momen Cesvs *opunayatet*, Vnet hesaketv tvklike toyis; este a'c oh atatet, estofvn -elawekon, este vc oh vkvksamatet estofvn ewvnhikekos.

36 Momis, Cemet, cv hecatskvnkis, vkvksamatskekos, ce kiovkvyis.

37 Cv'rke a'mvte omvlkt a'c oh awvres; momen eate a'c oh atat, estomaten ossihcvkos.

38 Vne komyat momecvranvyate tokon, a'c vtotvte komaten momecvranvyatet hvlwe a hvtapkvyvtet omekv.

39 Momen heyvt Cv'rke a'c vtotvte komatet os; este Cv'rke a'mvte emvlkvn hvnkusis sumecicvkot, nettv espoken a kwwvpvranyat omes.

40 Momen heyrt a'c vtoihte komatet os, Eppuce hecet, oh vkvksamat vtekat hesaketv emeyuksv-sekon ocvranet os; momen nettv espoken akvwvpares.

41 Momen Cusvlke ecayakovtes, Tvklike hvlwe a hvtapkute toyis, makaten.

42 Momen, Heyvt Cesvs, Cose e'ppuce toko haks, e'rke, e'cke tepakat kerreyat? momaten estomēn, Hvlwe a hvtapkvyat tes, maket oke haks? makakovtes.

43 Momekv Cesvs em vyoposket, Ecayet 'sete'm punahohyatskvs, kicakytes.

44 Este estomet vc oh vteko tayes, Cv'rke a'c vtotvtet ahvlytekon omate: momen nettv espoken a kvwvpares.

45 Omvlkv Hesaketymeset emvhayvres, make owalvlke coyakyte ofvn hoccet omes. Monkv este vtekat pohhet, Erke en kerryte *sasat* a vc oh atet omes.

46 Estimvt Erke hecvtes, *makit* okvkos, Hesaketvmesc aenkvpvkat tvlket, mvt Erke hecvtet omes.

47 Mehenwusen, mehenwusen ce kicvkis, Este vc oh vkvsamate hesakety emeyuksv-sekon ocet omes.

48 Vnet mv hesakety tvklike toyis.

49 Ce'rkvle vnrvwwn manvn hompakvtes, momet pvsatkvtes.

50 Heyvt tvkliket, hvlwe a hvtapkct omes, *este* mvn hompet, elekaranat.

51 Vnet tvklike hesake hvlwe a hvtapkvt toyis; este estomet heyy tvklike hompen omat, meyuksv-sekon hesakvres; momen tvklike emvranyat cv'navpeswv mv ekvny en hesakety vrakhv emvranyat omes.

52 Monkv Cusvlke 'setc'nrvpaket, Estomēt heyy este e'navpeswv pu'men, papeye taye hakes? makakytes.

53 Momen Cesvs em punayatet, Mehenwusen, mehenwusen ce kicvkis, Este E'chuswv e'navpeswv pvpekot, e catv eskatskekton omat, hesakety ece 'pikvkekos, kicvtes.

54 Estimvt cv'navpeswv papet, cv catv esken omate, hesakety emeyuksv-sekon ocet omes, momen nettv espoken a kvwvpares.

55 Cv'navpeswv mehenwvn hompetvt omen, cv catv mehenwvn esketvt omekv.

56 Estet cv'navpeswv papet, cv catv csken omat, vc ofvn fekhonnet omen, vneu ofvn fekhonnvyet omes.

57 Erke hesake likatet a'c vtovte omen, Erken v he-

sakvyet omes; matvpomen este cv hompatè, mvu vc v hesakovres.

58 Heyvt tvklike hvlwe ahvtapkatet omes. Ce'rkylke manv hompakat momet pysatkat omēkon: este heyy tvklike hompen omate, hesake emunkv tares.

59 Heyv nanvke, Kvpvnevn senekake ofvn este emvhayofvt, opunayet okvtes.

60 En kerrepvlke vnvcomet heyvn pohvktet, Opu-nvkv yekcet omes; estimvt pohe taye haks? makavtes.

61 En kerrepvlket heyvn es ecahoyen, Cesvs emet ker-rof, Heyvt ce 'lentappuecvk haks?

62 Monkv enhomv likvtet este E'chuswv v kvwapken hecatsken omat, *estomvre te?*

63 Puyfekcvt este wenahuecet omes; *este* enavpeswv naken lopicekos. Opunvkv cem punayvkvyatet puyfekcvt's, momet hesaketvt's.

64 Momis vkvsvmeko ce sasvket os; kicakvtes. Cesvs enhvteceskvñ vteken este estomvket vkvsvmekat kerret estimvt wiyyvranate kerre tatet ok.

65 Momet, Momēt omekv, Cv'rket emet omekon omat, este vc oh vte tetayate sahsekos, ce kicvkit okvyis, kicakvtes.

66 My vtekate en kerrepvlke vnvcomet fulecvtes, mont svnvcov vcvkfullekates.

67 Momen Cesvs pale hokkolohkakaten oket, Cemeu vpeyepvranatska? kicakvtes.

68 Momen Simv Petvt vyoposket, Pucasē, estimvn oh vpeyeyvr haks? cemet hesaketv yuksv-seko opunvkv ocetsket omes.

69 Momen vkvsamēt, kerrēs, mv Klist, Hesaketvmese hesake E'ppuce toyetskate, kicvtes.

70 Cesvs em vyoposket, Palen hokkolohkakatskan

ce'uhopoyvkvyvtet omeko haks? momen hvmkatskat  
puywsekev holwvket's, kicakvtes.

71 Cutvse Eskalevt, Simv e'ppucen okvtes, mvt, palon  
hokkolohkakat hvmkat omet, wiyyvranat omekv.

### SETENTVCKE 7.

HEYV nanvke renyupvn, Cesvs Kalvlen arvtes, Cusvlket  
clecetvn komet hopoyakat omecicen, Cutcvn vretvn  
komekokv.

2 Momis eto-esse-vpette-es-haye hompetv-rakkot Cusvlke  
en *hompetv-rakko* vwolice tates.

3 Momekv em etecakkvetvlket, Yvmv enkpaket, Cutcvn  
vyvs, cen kerrepvlkeu vtotketv celayetskat hecvkvren,  
kicakvtes.

4 Este, hecke kerhoyvren cyacet, chke naken celayate  
sahsekot ok. Heyv nanvke celayetsken omat, ekvnvn  
em e heckuecvs, kicakvtes.

5 Etecakkvtc tisem oh vkvsvmvkekot.

6 Momen Cesvs, Vm oketv vlvkeko munkes, momisem  
cem oketv take tetake emunkvt omes.

7 Ekvnv cen homecvkeko tetayet omes: momis vnen  
vn homecet omes, em vtotketvt holwahoket omen ohker-  
kuecvyet omekv.

8 Heyv hompetv-rakko oh vpeyvkes; heyv hompetv-rak-  
ko oh ayvko munkes, vm oketvt oreko munkekv, kicakvtes.

9 Heyv opunvkv kicakof, Kalvlen fekhonnvtes.

10 Momis etecakkvtc vpeyofvn, emeu hompetv-rakko  
oh ayvtes, kerhoyekon, momis ehke omēt.

11 Momen Cusvlke, hompetv-rakko omof hopoyet,  
Estvn ara? makakvtes.

12 Momen este tetayen opunvkv es ete'm ecakvt ocvtes;  
Este heret omes, makakat sasen, vpvlwvt, Monks, este  
ehosicet os, makakateu sasekv.

13 Momisem, estit pohaken opunvyccates, Cusvlken em penkvlakekv.

14 Momen hompetv-rakko en nvrkvpv orofvn, Cesvs cuko-vcakan ccyet, estemvhayvtes.

15 Momen Cusvlke, em estomahet, E'mvhahoyvte sekot omat, estomēt heyy este zokv kerre haks? makavtes.

16 Cesvs em vyoposkatet, kicavtes, Vm mvhakv cvnake tokot omen, momis a'c vtovte enaket omes.

17 Estimvt mv koinaten celayen omat, invhakv kerrvres, Hesaketvmeset ome tat, monkat vntvlket opunayin omat.

18 Estet entvlket opunayen omat, vrakkueckvn e en hopoyet omes: momisem este vtovte vrakkuecetvn hopoyen omat, mvt mehenwvt omes, momen fvceetv-tokat vpikekot omes.

19 Moses vhakv ce'mvkekak haks? momaten hvmsatskis vfastatskekot omes. Estoman cv 'lcevranet es fullatske haks?

20 Este em vyoposkaket, Puyvfekcv holwvken ocetskes; cstimvt ce 'lecetvn komet es are haks? makavtes.

21 Cesvs em vyoposket, kicavtes, Vtotkctv hvmsken momehcin, omvlkvt estomahes koinatsket omes

22 Monkv Moses svkvmsiskvn ce'mvktet omes: (Momis Mose enake tokot, erkvlke enaket omvtes:) momaten fekvpkv nettvn hunvnwv svkvmsisatsket omes.

23 Mose em vhakv kvckekaren, fekvpkv nettv omof svkvmsiskvn hunvnwvt en hecken omate, hunvnvwv fekvpkv nettvn temvpoken cvfeknihevyaten estoman vn homecatsko haks?

24 Nake on heckv vcvkvye ohfvcehcatskvs, momis fvccen ohfvcoecvkes.

25 Momen Celuslvmlke, Elecvrane hopoyakat heyvt mv toko haks? makakat sasvtes.

26 Momis hecvkes, fekhvmket opunayes, momen naken

kihocckot omes. Mvpvkvlke heyyt Klist mehenwvt on kerrvkepet ome haks?

27 Momis heyy este estvn vtē tat kerrēs: momis Klist vlakofv, npvpt estvmimvn vte tat kerrekares.

28 Momen Cesvs cuko-vcakan este mvhayofvt, hvim-maket huehkytes, Cv kerratskes, momet estvmvn vtvycate kerratskes, momen vne komvyat tvlket vlaket omvkot omes, momisem a'c vtotvte, mv kerratskekak, mehenwvt omes.

29 Momis vne kerris, mvn aenkvpvket omin, mvt a'c vtotytet omekv.

30 Momof esetvn komakytes: momis npvpt enkc oh wvkecekates, em oketvt vlvkeko munket omekv.

31 Momen este sulket oh vkvsvmakat, Klist vlvkofvt nakeskerkv heyy este momecat es en hoyvnen momecvr haks? makakytes.

32 Falvsevlkc este sulket ehkuse nake mv omaken es cte'm punahoyen pohakof, Falvsevlke momen plestvlkc en homvhlhotvt este-en-wiketvn vtotvtes, esvkvren.

33 Momen Cesvs *e'te'm punayet*, Hofunusekon ece 'pakvkvyatet, a'c vtotvten oh ayvranyet omes.

34 Cv hopoyet, es cv hecatskekares, momen estvn likvyate awatskeko tetayes, kicakytes.

35 Momen Cusvlke ete'm punahoyet, Estvmvn ayet omen, eshecēkar haks? Centilvlke vwahaten oh ayet, Centilvlken emvhayvr haks?

36 Heyvt nak makety te? Cv hopoyatskis, es cv behcatskekos, momet estvmvn likvyat awatskeko tayes, makat, makakytes.

37 Hompetv-rakko nettv espoke, mv *nett*v rakkate omof Cesvs hueret, Estimvt ewvnhket on omat, vc oh atet, eskepekvs.

38 Estimvt vc oh vkvsmamen omat, Cokate vcvkvyen,

e'nvcofn ucwv hesaket a fihhonvres, maket, huekvtes.

39 (Momis heyy, oh vkvsvmakat, Puyvfekcv en heckvraner opunvyecet okvtes, Puyvfekcv Vcakat seko munkekv; Cesvs vrakkueckv seko munkekv.)

40 Monkv heyy opunvkv pohakof, este sulket, Heyv mv Owalv tat mehenwvt's, makavtes.

41 Vpvlwvt, Heyvt Klist tes, makavtes. Momis vpvlwvt, Klist Kalvlen aossvr haks?

42 Cokat, Klist Tewc honpsen osset, Tewc likvte, Perehem tvlofvn ossvres, makekat haks? makavtes.

43 Monkv Cesvs vrahkvn este etekvpvketvt *em* ocvtes.

44 Momen esetvn komakat sasvtes, momis estit enke oh wvcecekates.

45 Momof este-em-wiketvt plest enhomvhhotv, momet Falvsevlken en yicen, Estoman csawatskekisa? kicavtes.

46 Este-em-wiketvt vyoposkaket, Hunvnwvt heyy hunvnwv *opunvyate* omē opunayvte sekos, kicavtes.

47 Momof Falvsevlke em vyoposkaket, Cemeu cem ctchoskvke haks?

48 Este 'mvpvke, monkat Falvsevlke oh vkvsmvke sase haks?

49 Momis heyy este vhakv kerrvkekak ohtvhikvket os, kicavtes.

50 Nekotemvset, (mv nere Cesvs em vlakvtet hvmkat tot,) *okat*,

51 Puin vhakv, pohet momet naken estomat kerreko munket, este ohfvccecet ome haks? kicavtes.

52 Em vyoposket, Cemeu Kalvlen vtetske te? Vketecet, hecvs; owalv hvmkis Kalvle a ossekot omekv, kicavtes.

53 Momen este omvlkvt en cukon vpeyavtes.

## SETENTVCKE 8.

Cesvs ekvnhlwe Olefvn ayvtes.

2 Momen hvthvyvtkusen hvtvm cuko-vcakan vlaket, ecchyet, este omvlkvt en yicen liket emvhayakvtes.

3 Momen cokv-hayvlke Falvsevlke esyomat hokte hoktaren eshoyen 'sen yicvtes, momet en nvrkvpvn licof,

4 Mvhaya, hevv hokte hoktare mvketeken eshēcēs.

5 Momen Moses vhakv ofv, Mv omakat cvton es nvfho-kvkekvs, pu kicvtes: momis ceme. estomēn maketske haks? kicakvtes.

6 Yv *makakat*, eskerret, esvnrpkvn *hopoyet*, kicakvtes. Momis Cesvs cunehket, enkewesakvn ekvnvn 'soh coyvtes, *nak makakat poheko omēt*.

7 Momen em 'pohakat vwicecvkekon, a lvpotiket, Naorketv oceko ece 'pakvkat tatet cvto 'svfvllekvs, kicakvtes.

8 Momen hvtvm cunehket, ekvnvn oh coyvtes.

9 Momen pohakat em vkerrickvt ohfvccecen, veule mahat vlicecet, hvmkvntot osset, pokvtes, momen Cesvs entvlket vhoskvtes, momen hokte nvrkvpvn tvk hueron.

10 Momof Cesvs, a lvpotiket, este sekon, momis hokte tvlkusen hecof, Hoktē, mv ece'nrapvlke estvmvn fulla? este hvmkis ec ohfvcceceko? kicvtes.

11 Pucasē, npvpt vc *ohfvcceceks*, makvtes. Momen, Vneu ec ohfvccecvkos; vyvs, momet vnvcomv naoriketskvs, Cesvs kicvtes.

12 Momof Cesvs hvtvm em punvyakvtes, maket, Vnet ekvnv en hvyayvke toyis; mv a'c cvkayat yomuckofvn yvkvpекares, momis hesaketv en hvyayvken ocvres.

13 Momekv, Cemet e ohkerkuecetskes, cem ohkerkueckv mehenwekos, Falvsevlke kicakvtes.

14 Cesvs em vyoposket, kicakvtes, Vnet e ohkerkuecv-yisein, vñm ohkerkueckv mehenwet os: estvmvn vtvyvte

tat kerrit, estvmvn ayvyat kerrikv; momis centake estvmvn atvyat, momet estvmvn ayvyat kerratskekot os.

15 Centake enavpeswv vcvkvyen ohfvccecatskes; vne estimvn ohfvccecvkos.

16 Momis ohfvccecin omat, vm ohfvccceckv mehenwet os: vne vntvlkekos, momis Erke a'c vtovtten vnen *tepakes*.

17 Hvtvm, Este hokkole kerkuecat mehenwvt os, *maket*, cem vhakv take ofv coket os.

18 Vnet o ohkerkuecwyat hvmkat toyis, momen Erke a'c vtovtet vc ohkerkuecet os.

19 Momof, Ce'rke ta? kicakvtes. Cesvs vyoposket Centake vne tis, Cv'rke tis kerratskeks; vne cv kerratskvten omat, Cv'rkeu kerratskvnt omekv, *kicvtes*.

20 Heyv opunvkv Cesvs cvtokunawv huten opunayet okvtes, cuko-vcakan estemvhayof: momen estimvt enken oh wvkecekates; en hvsc-vkerkvt hvte vlvkeko munkekv.

21 Momof, Ayis, momen cv hopoyatskvres, momet cen naorketv ofvn pvsatkatskvres; estvn ayvyat awatskeko tayes, hvtvm Cesvs kicakvtes.

22 Estvmvn ayvyat awatskeko tayes, makekv, e clecvr haks? momof Cusvlket makakvtes.

23 Kvncvpv aenkvpvke toyatskes: hvlwe aenkvpvke toyis; ekvnv enake toyatskes; ekvnv enake toyvkos, Cesvs kicakvtes.

24 Monkv, Cen naorketv ofvn ce pvsvtkvkvres; co kicvkyis, mv toyvyat vkvsvmatskekon omat, cen naorketv ofvn ce pvsvtkvkvret okv.

25 Momof, Esti toyetska? kicakvtes. Momen, Mv enhvteceskv vteke ce kicvkvyyte.

26 Nanvke sulken ec opunvyeckv take, momet *ec* ohfvccetv take ocis: momis a'c vtovtet mehenwes; momen nanvke make polvyvtet, mvn ekvnvn 'sem punayis, Cesvs kicakvtes.

- 27 Erken opunvyecet okat kerrvkekates.
- 28 Momof, Este E'chuswv kwwahpatskof, *mv* toyvyat, momet vntvlkuset naken momecvkat, momis, Cv'rke v'mvhayvten, heyy nanvken opunayvyat kerratskvres.
- 29 Momen a'c vtovttet vc vpaket os ; Erket vntvlkusen cv wikekos ; *mv* nanvke afvceccicat momecvye munkvt omekv, Cesvs kicakvtes.
- 30 Heyv opunvkvn makof, sulket oh vkvsvmakvtes.
- 31 Momof Cusvlke oh vkvsvmakan *em punayet*, Vm opunvkv ofvn fekhonnatsken omat; mehenwusen vn kerrepvlke toyatskes ;
- 32 Momet mehenwvn kerratskvres, momen mehenwvt ce'nrecopvkvres, Cesvs kicakvtes.
- 33 Em vyoposkaket, Eplehame honvpse toyēs, momet *uvpvn* en sylvfkeyvte sekos ; estomēn, Ce'nrecopkvkvres, maketske haks ? *kicakvtes*.
- 34 Cesvs em vyoposket, Mehenwvn, mehenwvn ce kicvkis, Naorketv momecat vtekat naorketv en sylvfke tes.
- 35 Momen sylvfke yuksv-sekon cukon liket oimeks, momis Eppucet yuksv-sekon liket os.
- 36 Monkv, Eppucet ce'nrecopvken omat, mehenwvn ce'nrecopkvke tares.
- 37 Eplehame honvpse toyatskat kerris, momis cv 'lecetvn hopoyatskes, vm opunvkv ec ofv take fekhonnetv en sekot omekv.
- 38 Cv'rke vpake hecvyvtet opunayis, momen cemeu ce'rke vpake hecatskvtet momecatskes, *Cesvs kicakvtes*.
- 39 Em vyoposkaket, Eplehamet pu'rke tes, kicakvtes. Eplehame en hopuetake toyatsken omat, Eplehame em vtotketvn momecatskēs.
- 40 Momis hiyomat este mehenwv Hesaketvmese make pohvyvtet cem punayvkvyvten cv 'lecetvn hopoyatskes. Eplehame heyvn momecekates.

41 Ce'rke em vtotketvn momecatskes, Cesvs kicakvtes. Momof, Hoktarkv ofvn pu heckvte tokot os; Erke hvmkusen occ̄s, Hesaketvmese, kicakvtes.

42 Hesaketvmese Ce'rke taket on omat, vc vnokecatskēs, Hesaketvmese aenkvpahket, vtvyytet omekv; cv ſekkomat vtvyyte tokon momis ēmet a'c vtotvte omes.

43 Estomēt on vm opunkvn kerratskeko? vm punvkvn pohatskeko tayekv.

44 Ce'rke, puyvfekcv holwakat enake toyatskes, momet ce'rke cm eyackvn momecetvn komatskes: enhvteceskv vteken estelecvt omet, mehenwv ofvn huerekates, eme ofv mehenwv sekot omekv. Lvks̄etvn punayof, enake aossen opunayet os; laks̄vt omet, *lvks̄etv* e'rket omekv.

45 Momen vm vkvsvmatskekos, mehenwvn *cem* punayvkikv.

46 Estomatskat naorketvn vc ohfvcececatske haks? Momen mehenwvn opunayin omat, estomēn vm vkvsmatskeko haks?

47 Hesaketvmese enake tat Hesaketvmese em punvkvn apohicet os: monkv apohicatskekos, Hesaketvmese enake toyatskekokv, Cesvs kicakvtes.

48 Momof Cusvlket em vyoposket, Semelevlket omet puyvfekcv holwvken ocetskes, makeyat, tetayen okēko? kicakvtes.

49 Cesvs em vyoposket, Puyvfekcv holwvken ocvkos, momis Cv'rken vrakkuecis, momen cemet vlesketvn vn hayatskes.

50 Momis vrakkueckv e en hopoyvkos: hopoye, ohfvcecat hvmkes.

51 Mehenwvn, mehenwvn ce kicvkis, Estimvt vm opunkvn vcayecen omat, estofvn elkv hehcekos, kicvtes.

52 Momof Cusvlket, Hiyomat puyvfekcv holwvken ocetskat kerrēs. Eplehame elet os, momen ovalvlkeu,

moman, Estimvt vm opunvkv vcayecen omat, estofvn elkvn lahsekos, maketskes.

53 Eplehame pu'rke, elvte, 'sen rakketske te? momen ovalvlkeu psvtkes: estimvn e hayetske haks? kicakvtes.

54 Cesvs em vyoposket, Vnet e vrakkuecin omat, vm evrakkueckv nake tokos: vc vrakkuecat Cv'rke tes; mv pun Hesaketvmeset makatskat.

55 Momis emen kerratskekates: momis kerris: momen, Kerrvk's, makin omat, laksv centake omares: momis kerrit, em opunvkvn vcayecis.

56 Eplehame Ce'rke vn nettv hecetv afvcke tates, momet hecet, afvckvtes, *kicakvtes*.

57 Momof Cusvlke, Ohrolope palecahkepat oretskeko munkat, Eplehame hecetskvt haks? kicakvtes.

58 Mehenwvn, mehenwvn ce kicvkis, Eplehame seko munkof, toyis: Cesvs kicakvtes.

59 Monkv cvton ayocet, svfllvkvranvtes: momis Cesvs ehket, cuko-vcakan osiyet, ete'n nvrkvpvn eteropottet ayeptes.

### SETENTVCKE 9.

MOMET hoyanof, este-hunvnwv turheceko em munkv heckvten hecvtes.

2 Momen en kerrepvlket em 'pohet, Mvhaya, estimvt naorkvtet on ome haks? heyy hunvnwvt, monkat e'ckvlke *naorkvkvvtet on*, turhecekot heckvtet ome haks? maka-kvtes.

3 Cesvs em vyoposket, Heyv hunvnwv naorkvtet, momen e'ckvlket naorkakvten omekos: momis Hesaketv-mese em vtotketv eme es kerkyren omes.

4 A'c vtovte em vtotketvn vtotkvranvyat tvlkus, nettv emunkofvn: neret vlaket os, momof npvt vtotkeko tayes.

5 Ekvnvn arvye vtekat ekvnv en hvyayvke toyis.

6 Hvmmake opunayofvt, ekvnvn oh tofiket, tofketvn fakken es hayet, hunvnwv turhecekat *mv* fakken turwvn es en siyyvtes,

7 Momet kicvtes, Ayet, vkhvse Silovm *likan* er es okkosvs. Momen ayet, er es okkoset, hece haket er vlakvtes. (Silovm *maketv*, Vtothoye, maketvt's, ohyvtek-hoyen omat.)

8 Monkv em vwolicvlke, momen turhecekat homv hecakvte, Este nakvpohet likvnke, heyvt *mv* toko haks? makakvtes.

9 Heyvt *mv* tes, makakat sasen, vpvlwvt, *Mv* en heckv mahus, *makakvtes*. Emet, *Mv* toyis, makvtes.

10 Monkv, Estomēn ce turwv renayakvt haks? kicakvtes.

11 Em vyoposket, Hunvnwv, Cesvs kihocat, fakken hayet, cv turwvn '*svn* siyyiet, Ayet, vkhvse Silovm *likan* er es okkosvs, cv kicen, ahyit, rokkohsit, cv hece hakes.

12 Momof, Estvn are haks? kicakvtes. Kerrvks, kicvtes.

13 *Mv* turhecekaten Falvsevlke 'sen yicvtes.

14 Momen, *nettvn* Cesvs fakke hayet, turwv en renahuecat, fekvpkv nettv tates.

15 Momen hvtvm Falvsevlke estohmet renakv en hecke haket omat em 'pohakvtes. Momen, Fakken cv turwvn '*svn* siyyien, okkosvyis, momet hecis, kicakvtes.

16 Momekv, Heyv hunvnwv Hesaketvmese aenkvpvk tokos, fekvpkv nettv vcayeccekokv, Falvsevlke vpvlwvt makakvtes. Momen vpvlwvt, Estomēt este-naorkv tat heyv nakeskerkv momece taye haks? makakvtes. Momen este etekvpvkvetv *em* ocvtes.

17 Este turhecekan hvtvm, *Mv* ce turwv *cen* renahuecise estomes kicetska? kicakvtes. Owalv tes, makvtes.

18 *Mv* turhecekate ohfvccv renakv en heckat Cusvlke

vkvsvmvkekot, mv renakv en heckat e'ckvlken enhohike tvlkvtes.

19 Momet em 'pohaket makakytes, Heyvt ce'ppuce take, turheceko heckvte makatskat te? momat estomet hiyomat hecet ome haks?

20 E'ckvlket em vyoposkaket, makakytes, Heyv pu'ppuce tat, momet turhecekot heckvtet omat, kerrēs.

21 Momis nake omecicen hiyomat hecet omat kerrēkos, momet estimvt e'turwv en renahuecat kerrēkos: em vculkv orices: emen em 'pohvkes: e em opunvyepvres.

22 E'ckvlke heyv makakat Cusvlken em penkvlakat okakytes, Estimvt mvt Klist-tat maken omat, senekaken ossihocvres, *maket*, te'm vkvsvmvkepvtt omekv.

23 Momet okv, e'ckvlke, Vculkv orices: em 'pohvkes, maket okakytes.

24 Momen hvtvm este turhecekaten enhohiket, Hesaketvmesen vkvsvmkvn emvs; heyv hunvnwv naorkvt omen kerrēs, kicakytes.

25 Em vyoposket, Este-naorkvt ot kerrvks: nake hvmken kerris: cv turhecekot omvnket, hiyomat hecis, kievtes.

26 Naken ce 'stomecvt haks? estomēt ce turwv cen renahuecvt haks? hvtvm kicakytes.

27 Momen em vyoposket, Cem onayvkin hoyahnes, momen pohatskekises; estoman hvtvm pohvranatska? ceme takeu en kerrepvlke haketyv komatska?

28 Momen nakhayekot, Ceme en kerrepv toyetskes: momis pumet Mose en kerrepvlke toyepēs.

29 Hesaketvmeset Moses ete'm punayvtet omen kerrēs: momis heyv estet estvmvn vte tat kerrēkos, kicakytes.

30 Momen hunvnwvt em vyoposket kicakytes, Heyv ofvn nake estomahat oces; cv turwvn vn renahuecet oman, estvmvn vtē tat kerratskekak.

31 Mome estomis, Hesaketvmeset este-naorkvlke em

vphicekot omat kerres; momis este Hesaketvmese vrakkuecvt ot, nake komaten momecen omat, mvn em vphicet os.

32 Ekvnv vlicecvte vtakis este turheceko heckvtet este-hunvnwv eturwv en renahuecat pohohvte sekos.

33 Heyv este-hunvnwv Hesaketvmese aenkvpvke tokon omat, naken momeceko tayes.

34 Em vyoposket, Naorketv ofv mvketeken ce heckvtet ot omat, pu 'mvhayetske haks? kihcet, ossicakvtes.

35 Ossicakvten Cesvs pohet, eshecof, Hesaketvmese E'ppuce oh vkvsametske te? kicvtes.

36 Em vyoposket, Pucasē, estimvt mv te, oh vkvsym-pvye tayat? kicvtes.

37 Momen, Hecetskvties, momen mvt ce 'tem punayet okes, Cesvs kicvtes.

38 Momen, Pucasē, vkvsamis, maket, vrakkuecvtes.

39 Momen, Ohfvececkvn yvmv ckvnvn vlvkyet omes, mv hecvkekate hecvkren, momen mv hecakvte hecvkeko hakvren, Cesvs makvtes.

40 Momen Falvsevlke mv vpukakat, heyv opunkv pohakof, Pumeu pu turhecvkeko haks? kicakvtes..

41 Cesvs kicakvtes, Ce turhecvkekot omen omat, naorketv ocatskekvt os; momis hiyomat, Hecēs, makatskekvt, cen naorketv oce munk's.

## SETENTVCKE 10.

**MEHENWVN**, mehenwvn ce kievkis, Estit yvpefikhute em vhauken eceyekot, etvmin vcemket on omat, mvt horkopvt ot, svpenkvlecvt os.

2 Momis estit vhauken eceyet on omat, mvt yvpefikv-hecicvt os.

3 Mvn vhaukvheciev en hvwecet os; momen em opu-

nvkv en hake yvpefikv pohaket os; momen en yvpefikv hocefhuecet enhuehket, enhomahtet esosset os.

4 Momet en yvpefikv vpeyecicof, ehomvn ayet on, yvpefikv vcvkvp eyet os, em opunvkv en haken kerrvket omekv.

5 Momet este kerkekat vcvkvp ehye kos, momis em pefatkēs, este kerkekat em opunvkv en haken kerrvkekot omekv.

6 Heyv svhopakvn Cesvs es em punayet omvtes; momis nanvke tat kerrvkekates, mv em punayat.

7 Momen Cesvs hvtvm kicakvtes, Mehenwvn, mehenwvn ce kievkis, Vnet yvpefikv em vhauke toyis.

8 Cv homv yicvte omvlkvlt horkopvlket ot, svpenkvle-cvlket os: momis *vn* yvpefikv em apohicvkekaret os.

9 Vnet vhauke toyis: este estomet cv tehoyvnen ecseyet on omat, mvt hesakvres, momet ecseyet, er aosset, nanopkv hecvres.

10 Horkopv vlvkekos, horkopkvn, eleckvn, momet nak yvmahketvn komeko vtekat: *vn yvpefikv* hesaketv en heckvkvren vlvkvyvtet os, momet sulke mahet en heckv-kepvren.

11 Vnet yvpefikvhecicv herat toyis; yvpefikvhecicv herat yvpefikv vrahkv en hesaketv wvkeccet os.

12 Momis este pvlhoyat tat, yvpefikvhecicv *mahhe* tokot, yvpefikv e pucase tokon omat, yvhv vlaken hecis, yvpefikv wiuket; letkes, momen yvhvt cawet, yvpefikvn vwaheces.

13 Este pvlhoyat letkes, pvlhoyet omet, yvpefikv senaoricekot omekv.

14 Vnet yvpefikvhecicv herat toyis, momet *vn yvpefikv* kerrin, cvnake cv kerrvket os.

15 Erke cv kerrat etvpomen vneu Erke kerrvyet os: momet yvpefikv vrahkv *vn* hesaketv wvkecit omis.

16 Momet yvpefikv etv ocvyet os, heyy hute a 'sossat

tokon : mvu 'svlvkvranyet os, momen mvt vm opunvkv en haken pohvkres, momen fulle hvmkusen, yvpefikvhe-ciev hvmkusvres.

17 Monkv Cv'rke vc vnokecet os, *vn* hesaketvn wvke-cvyet omékv, hvtvm eseparet.

18 Este estomet vm esekot os, momis vne mahusatet wvkecvyet os. Wvkecetv yekcetv ocvyet os, momet hvtvm esetv yekcetv ocvyet os Heyv vhakv Cv'rket v'mvtet os.

19 Monkv hvtvm Cusvlke etekvpvketvt em ocytes, heyy opunvkv omecicen.

20 Momen sulket, Puyvfekcv holwken ocet, hacohakes; estoman em vpohicatske haks? makakytes.

21 Vpvlwvt, Heyvt puyvfekcv holwke oce em opunvkv tokos. Puyvfekcv holwket turhecvkekcat e turwvn renahuece taye haks? makakytes.

22 Momen *mekusvpkv* hompetv-rakkot, Enkinev kihocat, Celuslvmen ocytes, momen rvfo tates.

23 Momen Cesvs cuko-vcakan, Salomv 'sem ohvpettv *kicetvn* yvkapvtes.

24 Momen Cusvlke yicet vnvkaftvtes, momet, En hofune estomēn vkvsvmēkon pu hayetske haks? Klist toyetsken omat, kerky heren pum onvyvs, kicakvtes.

25 Cesvs em vyoposkaket, Cem onayvkvyis, vkvsvmatskekis: vtotketv Cv'rke e hocefkv ofv vtotkvyat, mvt vc ohkerkuecvket os, kievtes.

26 Momis vkvsvmatskekos, vn yvpefikv vpvke toyatskekokv, ce kicvkvyat etvpomen.

27 Vn yvpefikv vm opunvkv en haken pohvket os, momen kerrakin, vc vcvkppeyet os :

28 Momen hesaketv yuksv-sekon emakvyet os, momen estofis estemerrahkekos, momen npvt cv'nke 'svm ossiceko tayet omvres.

29 Cv'rke, v'mvte tat, omvlkvn 'sen rakket os: momen estimvt Cv'rke e'nke 'sem ossice tayat yekcetv ocekot os.

30 Vne Cv'rke tepakeyat hvmkusēs.

31 Momen Cusylke, cvton es nvfketvn *komaket*, hvtvm cvto cwakvtes.

32 Cesvs em vyoposket, Vtotketv herake sulken Cv'rke aenkvpvke ce hecicvkvyēs; mv *vtotketv* estomaten cvto es cv nvfkatske haks? *kicvtes*.

33 Cusylke em vyoposket, Vtotketv herat *tat* cvto es ce nvfkēkos: momis Hesaketvmese tvklecetskat omecicen, momet, este toyetskatet, Hesaketvmese e hayetskekv, kicakvtes.

34 Cesvs em vyoposket, *kicvtes*, Hesaketvmese toyatskes, mahkis, cem vhakv take ofvn es hoccet omeko haks?

35 Hesaketvmese em opunvkv em vlakvten hesaketvmese taken kicvten omat, momen Cokat kvckeko tetayen *omat*,

36 Hesaketvmese E'ppuce toyis, ce kicvkikv, Erke vcake haye, momet ekvnv atotvte huerat, Hesaketvmesen tvklecetskes, kicatske haks?

37 Cv'rke em vtotketv taken momecvkot on omat, vm vkvsahmatskvs.

38 Momis momecin omat, vm vkvsvmatskeko estomis, vtotketvn vkvsvmvkes, Cv'rke vnen vc vpiket omen, vneu emen vpikvyet omen kerret, vkvsvmatskvret.

39 Monkv hvtvm esetvn komakvtes: momis enke em ossakvtes.

40 Momet Cotvne tvpalvn ahyet, enhvteceskv Cane este paptisvte ocan er oret, mvn fekhonnvtes.

41 Momen sulket vfuller, Cane tat nakeskerkv momcekate os, momis Cane heyy este opunvyecvte omvlkvt mehenwvt os, makakvtes.

42 Momen mvn sulket oh vkvsvmakvtes.

## SETENTVCKE 11.

1 Momof este-hunvnwv Pervnvlke, Lisvle *hocefket*, enokke tates: *Pervne* Mele Mare etecakkateu eme tvlofv tates.

2 *Mv* Melet omvtes, vfekv Pucase es em vfeye, e'le e'kvesse es en hvsvtecvte mv e 'cerwv Lisvlet enokket ot omat.

3 Monkv e wvntaket ohtotakvtes, Hecvs, Pucasē, mv vnokecetskat enokkes, makaket.

4 Cesvs pohof, Heyv enokketv elkv orekot os, momis Hesaketvmese vrakkueckv vrahkv tes, mv eteropotten Hesaketvmese E'ppuce vrakkuehocvren, makvtes.

5 Momen Cesvs, Mare, momen etecakkat, Lisvle esyoman vnokecvke tates.

6 Monkv enokkveuken pohof, mata likvtet nettv hok-kolen sekhonnvtes.

7 Mv hoyanof, Cutevn hvtvm vpeyvkeres, enkerrepvlken kievtes.

8 Enkerrepvlket okat, Mvhaya, Cusvlket hvtv vwole cvton es ce nvfketvn komakvnks: moman hvtvm mvn ayvranetske haks? kicakvtes.

9 Cesvs vyoposket, Nettv hvmkat hvse-vkerkv palen hokkolohkaket omeko haks? Estet nettvn yvkapen omat, elentappekos, heyy ekvny en hvyayvken hecekv.

10 Momis estet neren yvkapen omat, elentappes, hvyayvket vpikekot omekv, *kievtes*.

11 Heyv nanvken makvtes: momen erenyupv, Pon hesse Lisvle nocet omes: momis nocan vhonecicaret ayvyet os, makvtes.

12 Momof en kerrepvlket, Pucasē, nocet on omat, en hervres, makvtes.

13 Momis Cesvs em elkv opunvyecet okvtes: momen, Fekapet nocet on okes, komakvtes.

14 Monkv Cesvs *em punayat*, kerkusen, Lisvle clet os.

15 Momen ece 'rahkv taken vrvkate vc afvckes, vkvsamatskvren; mome estomis oh vpeyvkeres, kicakvtes.

16 Momof Tamvse, Tetemvse kihocat, kerrepvlke em etohkvlketvn kicvtes, Pumeu vpeyvkeres, vpaket psvtkeyvret.

17 Cesvs vlakof, entis en sepvlkv ofv nettv osten wakkepen kerrvtes.

18 Momen Pervne Celuslvme em vwolet omvtes, vkerkv hokkolet mahet.

19 Momen Cusvlke sulket Mare Mele tepakan en yicvtes, e'cerwv ohfvccvn emahlvpvtvret.

20 Momen Mare Cesvs vlakvcuken pohan vpaket, vnrvpvranet ayvtes; momis Mele fekhonnet, cukon likvtes.

21 Momen Maret Cesvs em punayet kicvtes, Pucasē, yvmvn aretskvten omat, cv 'cerwv elekvnt os.

22 Momen hiyome estomis, Hesaketvmese nak estomen em 'pohetskat Hesaketvmese ce'mvret on kerris.

23 Ce 'cerwv hvtvm akvwvpkvres, Cesvs *Maren* kicvtes.

24 Maret *a em punayet*, Nettv-espoke akvwvpketv omof hvtvm akvwvpkvret on kerris, kicvtes.

25 Cesvs *Maren em punayat*, Vnet akvwvpketv toyit, hesaketv toyis: estimvt vc oh vkvsamat, elvtet o estomis, hesakovres.

26 Momen estimvt o estomis wenaket, vc oh vkvsamat, estofis ehlekos. Heyv vkvsvmetske te ? kicvtes.

27 Maret em punayat, Henka, Pucasē, Klist Hesaketvmese E'ppuce yvmv ekvny vlvkvrannte toyetsken vkvsmis, kicvtes.

28 Momet, mvn momēn mahkof, ayet, etecakkat Melen ehken enhuehkvties, Mvhayvt vlvkes, momet ce'nhuehkes, kicet.

29 Mvn pohan vpaket, *Melet*, lvpkens ahuyiret, a oh atvtes.

30 (Momen Cesvs tvlofv a eceyeko munket, mv Mare er vrapvte tan fekhonne tates.)

31 Cusvlke mv emvhlpvtake vpake cuko ofv vpokat, Melet lvpecicet ahuyiret, ossen hecakof, vcvkvpeyvtes, Sepvlkvn oh ayet er hvkihkvranc os, makaket.

32 Momis Mele, mv Cesvs fekhonnан vlaket, hecof, e'len v tvk lvtiket, Pucasē, yvmvn aretskvtten omat, cv 'cerwv elekvnt os, kicvtes.

33 Momen Melo hvkihken, Cusvlke vpvkc yicateu hvkihhoken Cesvs hecof, puyvfekcv ofvn hihket, fekherekates.

34 Momet, Estvmvn wvkecatskvnk? kicen, Pucasē, ahtet, hecvs, kicakvtes.

35 Cesvs hvkihkvtes.

36 Momen Cusvlket, Hecvkes, vnokecc heraten! makakvtes.

37 Momen, Heyv hunvnwv turhecvkekcat tis en renahuecet ont omat, heyv este-hunvnwv elekare tayen hayeko tayvt haks? makakat sasvtes.

38 Monkv Cesvs hvtym eme ofvn hihket, sepvlkvn vlavkvetes. Cvtohauket omen. cvtot oh liket omvtes.

39 Cvton vkueyicvks, Cesvs kicvtes. Maret, mv elat c 'wvnwvt, Pucasē, hiyomat fvmpepes, elvte nettv ostekv, kicvtes.

40 Momen Cesvs em punayat, Vkvsvmetsket on omat, Hesaketvmese en rakke hecetkvres, ce kicvkisa? kicvtes.

41 Monkv ele wakkat cvton vkueyicakvtes. Momen Cesvs e turwv hvlwen v kvwapket, Cv'rke, ece 'kvsamis, vm vpoihcetskek.

42 Momet estofis vm vpohicetsket omat kerryis, momis este heyv svpaklat pohet, cent a'c vtotetskvtet omat ker- rvkepvren okvyis, makvtes.

43 Momet hiyomēn opunahyof, yekcicet huehket, Lisvlē, aossys, makvtes.

44 Momen elvte aossvtes, hopele vcceckv enke eleu es vpvlkvket, momen e turofv enockuce es vpvlkvket. Enrecohpatksen, vyepekvs, Cesvs kicvtes.

45 Monkv Cusvlke Mele en yice, Cesvs nanvke momecan hecakat sulket oh vkvsvmakvtes.

46 Momis vpvlwvt, Falvsevlken oh vpeyet, nanvken Cesvs momecat en kerkuecakvtes.

47 Momof plest enhomvhhotv, Falvsevlke esyomat tekueketvn nvkaftecet, okat, Naken estomēceya? Heyv hunvnwv nakeskerkv sulken momecet ok;

48 Hiyomēn wikēn omat, este omvlkvts oh vkvsvmvkvr̄es, momen Lomvlket yihtet, pum etvlwv ekvnv tepaken pu 'konahvres, makavtes.

49 Momen hvmket, Kiefvse hocefket, mv ohrolopen plest enhomahtv hvlwat omet, *em punayat*, Naken kerratskekot os;

50 Momet este hvmket este em elaten, etvlwv omvlkvts yvmahkeko tayet; es pun here tayet omat, vkerricatskekot os, kicavtes.

51 Heyv emet e opunvyecet okekates, momis mv ohrolopen plest enhomahtv hvlwat omekv, Cesvs mv etvlwvn em elvranet omen;

52 Momet mv etvlwv tvlkek, momis Hesaketvmese en hopuetake vwahat omvlkvns hvmkusen etoh vteloyvranan owalet okvtes.

53 Momen mv nettv vteke ayat elecetvn komet, etem-punahoyakvtes.

54 Momekv Cesvs Cusvlke hecke vpake vreko hakvtes; momis vnrwwv vnaky ekvnv likan ayet, tvlofv Eflevm kicetvn eceyvtes, momet mvn en kerrepvlke esyomat fekhonnvtes.

55 Momen Cusvlke em ohhoynkvts vwolice tates; mo-

men este sulket, ohhooyvnkv hvte oreko munken, Celuslv.  
men vpeyvtes, e hvsotecvkvranel.

56 Monkv Cesvs hopoyakvtes, momet cuko vcakat ofv  
svpaklet, Estomen vkerricatske haks? hompetv-rakko  
vlvkekares *komatske haks?* maket etempunahoyvtes.

57 Momen plest enhomvhhotv Falvsevlke esyomat, este  
estomet estvmvn hecke tayen kerren omat, onayen, ese  
tayat opunvkv ossicet omvtes.

### SETENTVCKE 12.

MOMEN ohhooyvnkv orcko nettv epakat vhoske munken,  
Cesvs Pervnen er orvtes, Lisvle pvsatkat a en kvwapvte  
likan.

2 Mvn yafke hompetv-rakkon en hayakvtes; momen  
Maret ohvfastvtes; momis Lisvle *Cesvs* vpvke hompvrane  
vpokan hvmkat tates.

3 Momen Mele, vfekv espeknv *kihocet*, vcake heren,  
vtarkv hvmken ohmet, Cesvs elen 'sen siyyiyet e'kvessen  
'sen hvsotecvtes: momen mv vfekv en fvmece cuko  
fackvtes.

4 Momof en kerrepvlke hvmket, Cutvse Eskalevt, Simv  
*e'ppucet*, wiyyvrane hueratet,

5 Estoman heyy vfekv tenelyv cukpe tutcenen wiyyiyet,  
estemerrakan emhoyekvt haks? makvtes.

6 Heyv makat este estemerrakan senaoricet okekates;  
momis horkopvt omet, sukcvn esaret omet, momet nake  
vtehkan esaret omekv okvtes.

7 Momis, Naoriheatskvs, cv herihocvrane nettv vrabhvn  
heyvn vcayecvtet os.

8 Estemerrakat ece'pakvke ocatske munkvt omen,  
momis vntat ocatske munkv tokot omekv, Cesvs kicv-  
tes.

9 Monkv Cusvlke sulket mv fekhonnat tat kerraket, a

oh vwakytes, Cesvs vrahkv tylkekon, momis Lisvle pvsatkat a en kwwapte hecetv *komat omakvtes*.

10 Momen plest enhomvhhotvt, Lisvlen elecetvn komet, tempunahoyvtes:

11 Mv omecicen Cusvlke sulket vpehyet, Cesvs oh vks-svmvkepekv.

12 Rempvksen este sulket hompetv-rakkon yicet, Cesvs Celuslvmen vlakvcuken pohakof,

13 Talv elvccen es cahwet, vpeyvtes, vnrvpvranet, momet huehoket, Hosany! Eslevl em mekko, Hesaketvmese hocefkv ofv vlakat vkvsvmket omes, makaket.

14 Momen Cesvs corakko-waky mvnettusen eshecof, mvn ohlikvtes, Cokat *hvmmakat* etvpomet.

15 Ce penkahlates, Sivn e'chushokte toyetskat; hecvs, cem Mekko vlakes, corakko-waky e'chuswvn ohliket.

16 En kerrepvlke heyy nanvke kerrvkekates, enhvtesceskv; momis, Cesvs vrakkuehohcof, heyy nanvke emen opunvyecet cokat omen, momen heyy nanvke em momecakvten, vkerricakvtes.

17 Momekv mv este, Lisvle enhohike en sepvlkv aossice pvsatkat a en kwwapof vpvkakat, kerkuecakvtes.

18 Heyv omecicen estet er vnrvpakvtes; momen heyy nakeskerkv, momecvten pohvket ok.

19 Nake estomatskekakat hecatska? Falvsevlket ete kicakvtes. Hecvkes, ekvnv omvlkt vcvkvpeyepes.

20 Momen *Hesaketvmese* vrakkuecvrane hompetv-rakko yican Klekvltet vpvke tates;

21 Monkv matvwvt, Felvpe Kalvle *ekvnv* Persitv *twlofv* aossan en yicet, Pucasē, Cesvs hecetvn komēs, kicakvtes.

22 Momen Felvpet vlaket, Antolun em onayvtes; momen hvtvm Antolu Felvpen tepaket Cesvs em onayakvtes.

23 Momen Cesvs em vyoposkaket, Hvse-vkerkv vlvkes, este E'chuswv vrakkuehocvranat, makvtes.

24 Mehenwvn, mehenwvn ce kicvkis, Teleko nerkv ekvnv oh lvtiket lekweko vtekat emunkis, entvlkuset liket os: momis lekwen omat, em ette sulken hayes.

25 Estimvt en hesakety vnokecat sumecicvres; momis estimvt en hesakety en homece yvmv ekvnv *huerat*, hesakety yuksv-sekat roren vcayecepvres.

26 Este vm vtotken omat, vc vcvkyyekvs: momen estvmvn likvyat, mvn vm vtotkv likvres: momen este vm vtotken omat, mvn Cv'rket vrakkuecvres.

27 Hiyomat vm puyvfekcv fekherek's, momen naken makar haks? Cv'rke, heyy hvse-vkerkv enkvpvken cv hesayecvs; momis heyy vrahkvn heyy hvse-vkerkvn vlakyet os.

28 Cv'rke, ce hocefkvn vrakkuecv. Momof opunvkv en hake hvlwe atatet vlakvtes, Vrakkuecvyvtet omet, hvtvm vrakkuecares, *maket*.

29 Momekv mv este vnakv svpakle pohakat, Tenetikes, makakvtes: vpvlaket, Encelvt em punayet os, makakvtes.

30 Cesvs em vyoposket makvtes, Heyv opunvkv en hake vc vrahkvn vlaket omekos, momis ece 'rahkv taken *omēs*.

31 Hiyomat heyy ekvnv ohfvccet os: hiyomat heyy ekvnv em mekko ossihocvres.

32 Momen ekvnv enkvpvken cv kvwwphoyen omat, este omvlkvn a e oh hlvltares.

33 Heyv makat elkv estomen elvranat kerkuccat okvtes.

34 Estet em vyoposkakat, Klist hesake emunkvt os, vhaky aossen *makat* poheyvtet os, momen estomen, Este E'chuswv kvwwpkvranet os, maketske haks? Heyv este Echuswvt estimvt o haks? *kicakvtes*.

35 Hvte vhofunusekon hvyayvke ece 'pakvet os. Ykvvpvks, hvyayvke ocatskof, yomucket ec oh vlakvkekaren; yomucke ofv yvkapat estvmvn ayat kerrekot omekv.

36 Hvyayvke ocatskof, hvyayvke ofvn vkvsvmepvks, hvyayvke en hopuetake toyatskvret, momof Cesvs kicavtes. Heyv nanvken Cesvs opunahyet, enkvpaket em ehkakvtes.

37 Momis nakeskerkv sulke moman ehomv momecet omis, oh vkvsvmvkekates:

38 Esivs owalv nak makvte esohfvckvren, Pucasē, estimvt nake kerkuccyat vkvsamvt haks? momen estimvn Pucase e'nce en nekekv estimvn hecihocvt haks? make opunayat.

39 Momekv oh vkvsvmvkeko tayvtes,

40 E turwv becvkekon hayet, e feke en wvnwvheces, monkon omat, e turwv es hecet, e feke es kerret, fulotecen, em wicecvkye tayen, Esivs hvtvm *opunayet*, makvet omekv.

41 Esivs heyy nanvke makat, en rakken hecet, opunveyecofvt okvtes.

42 Mome estomis evpayvlke rvkrakat sulket oh vkvsvmakvtes, momis Falsevlke omecicen kerkuccykekates, senekaken sossihocvkekaren.

43 Este vkvsvmvkyre *mimvn* Hesaketvmese vkvsvmvrc 'semuntylen vnokecvket omakekv.

44 Cesvs huehket makvtes, Estimvt vc oh vkvsamat, *vnen* vc oh vkvsamet omekos, momis a'c vtotvten oh *vkvsamet omes*.

45 Momen estimvt cv hecat a'c vtotvten hecet os.

46 Vnet hvyayvke ekvnvn vlvkyet os, estimvt vc oh vkvsamat yomuckofv fekhonnekaren.

47 Momen este vm opunvkv pohet, vkvsvmekat ohfvc-

cecvkot os; okvny ohfvcccvranit vlakit omvkot, momis ekvnvn hesayecvranit *vlakit omekv*.

48 Estimvt, vm opunvkv esekot, vc vhepaken omat, hvmket ohfvcccat ocet os; opunvkv opunayvytet, mvt ohfvcccvres, nettv espoken.

49 Vntvlket opunayet okvkos, momis Erke a'c vtovtet, emet vhakv v'mvtet os, naken makvranvyat, momet naken opunvyvranyat.

50 Momen em vhakv hesaketv yvksv-sekot omen ker-ris: momekv naket o estomen opunayvyis, Erke cv kicvte etvpomen opunayvyet os.

### SETENTVCKE 13.

MOMEN ohhooyvnkv hompetv-rakko oreko munken, heyy ekvnv osiye, Erke oh vyepvranat en hvse-vkerkv vlaken Cesvs kerret, enake ekvnv fullaten vnokecvtet, eyuksv roren vnokecvtes.

2 Momen hompetv hoyahnof, puyvfekcv holwakat Cutvse Eskalevt, Simv e'ppucen wiyyvren e fekon en pih-ken,

3 Cesvs Erket nanvke omvlkvn e'nke ofvn wiken ker-ret, momet Hesaketvmesen aenkvpvkvttet ot, Hesaketv-mesen oh ayepvranat *kerret*,

4 Hompvte ahuyiret, kapv etvn kayvtes, momet turofeshvsvteckvn cahwet, es e wvnakvtes.

5 Mohmof uewvn pvlvknvn a vcahnof, en kerrepvlke e'len em okkosetvn momet turofeshvsvteckv es e wvnakatet es en hvsvtecetvn vlicecvtes.

6 Momof Simv Petvn em vlakytes: momen Petvt, Pucasē, cv'le vm okkosetske haks? kicvtes.

7 Cesvs em vyoposket kicvtes, Nake momecvyat hiyo-nat kerretskekos, momis heyy cryupvn kerretskvres.

8 Cv'le estofis okkohsetskekos, Petvt kicvtes. Cesvs

em vyoposket, Ec okkosvkon omat, ece 'rahkv vc vpv-yetskekos, *kicvtes*.

9 Pucasē, cv'le tvlkekcon, momis cv'nken, ev'kvu, Simv Petvt kicvtes.

10 Este vklopet on omat, e'le tvlket okkosvre em vhoskes, momen hvmkvt hvsvtket omes; momen ce hvsvthv-kvkes, momis omvlkek's, Cesvs kicvtes.

11 Estimvt wiyyvranat kerrekv, Omvlkvt ce hvsvthvkv-ket ot omekos, maket okvtes.

12 Momekv ele em okkosahkof, en kapv cahwet, hvtvm lihket, Naken cem momecvkvyat kerratske haks? kicvtes.

13 Mvhayv momet Pucase cv kicatskes, momen tetayen okatskes, *mv* toyikv.

14 Monkv vnet, Pucase *tat*, momet mvhayv toyvyat, ce'le *cem* okkosvkin omat, centakeu ce'le ete'm okkosvranaatsket os.

15 Vhayetvn ce'mvkvyet omekv, cem momecvkvyat etvpomen momecatskvren.

16 Mehenwvn, mehenwvn ce kicvkis, Vtotkv e pucasen 'sen rakkekot os, momen vtothoyat vtotat 'sen rakkekot os.

17 Heyv nanvke kerratsken omat, cen hervket os, momecatsken omat.

18 Omvlkatskan ec opunvyecvkit okvkos. Estimvn enhopoyepvyvte tat kerris, momis Cokat esohfvckvren, Mv vc vpyke tvklike hompat vc vnrvpen e'leceskv kvwaptes.

19 Momen hvte hoyvneko munken cem onayvkis, eshoyahnof, vnet *mv* toyvyat vkvsvmatskvren.

20 Mehenwvn, mehenwvn ce kicvkis, Estimvt vtotvyan evpayen omat, vñen cv yvpvyet os; momen estimvt *vnen* cv yvpayen omat, vc vtotvten evpvyet os.

21 Cesvs heyy mahkof, puyvfekcv ofvn fekherekot,

kerkuecet makvtes, Mehenwvn, mehenwvn ce kicvkis, hvmkatskat cv wiyyvranatskes.

22 Momen en kerrepvlket estimvn opunvyecet okat en kerkvkekot, etc hecakvtes.

23 Momen en kerrepvlke hvmke, Cesvs vnokecat, Cesv e hokpen vccakvtes.

24 Momekv Simv Petvt, estimvn opunvyecet okat em 'pohvren enken es em vhopayvtes.

25 Momof Cesvs e hokpen vccaket, Pucasē, estimvt o haks? kicvtes.

26 Hompetvn esvklihvyof, estimvn e'mvyat, mvt mv tes, Cesvs vyoposket *makvtes*. Momen esvklihcof, Cutvse Eskalevt, Simv e'ppucen emvtes.

27 Momen pahpof, puyvfekcv holwakat eceyyvtes, momen, Mv momecvranetskat, lvpken momecvs, Cesvs kicvtes.

28 Momen ohhompetv vfilotakat, npvt kerrekates, estoman heyy em punayet okat.

29 Cutvse sukcvn ocet ok, *Nake hompetv-rakko* pu yacan nesvs, Cesvs kicet okes, monkat naken estemerrakan emvren *okes*, komakat svset omekv.

30 Momen hompetv en heckan vpakusen ossvtes. Momen nere tates.

31 Momekv osiyof, Mucv este E'chuswv vrakket os, momen Hesaketvmeset eme ofvn vrakket os, Cesvs makvtes.

32 Eme ofvn Hesaketvmeset vrakken omat, Hesaketv- meseu vrakkuecvres eme ofvn, momet lvpkuseu vrakkue- cvres.

33 Hopuetakucē, hvte hofunnsekon ece 'pakvkit omis. Cv hopoyatskvres, momen, Estvn ayvyat vwatskeko tayes, Cusvlke kicvyvnke etvpomen hiyomat ce kicvkvyet os.

34 Vhakv mucvsen ce'mvkis, Ete 'nokecatskvren; ece nokecvkvyyte etvpomen, centakeu ete 'nokecatskvren.

35 Vnokeckv ete'm ocatsken omat, heyvn *este* omvlkvvt es kerrvkres, vn kerrepvlke toyatsket omat.

36 Pucasē, estvmvn ayetska? Simv Petvt kicvtes. Estvmvn ayvyat hiyomat vc vcvkayetskeko tayes, momis eryupvn vc vcvkayetskvres, Cesvt em vyoposket *kicvtes*.

37 Pucasē, estoman hiyomat ece 'cvkayvko taye haks? Vn hesaketv ece 'rahkv wvkecares, Petvt kicvtes.

38 Cen hesaketv vc vrahkv wvkecetkvr haks? Mehen-wvn, mehenwvn ce kicis, Tottolose hakeko munken vtut-cenv vc vrahkv ehelvksecetkvr, Cesvt em vyoposket *kicvtes*.

#### SETENTVCKE 14.

Cē feke cen naorvkates; Hesaketvmese oh vkvsamatzkes; vneu vc oh vkvsvmvkes.

2 Cv'rke hute osv liketv sulket os; monkaten omat, cem onvyvkvynt os. Liketvn cem etetakuecvranvkit ayis.

3 Momen ayit, liketvn cem etetakuecvkin omat, hvtvm 'rvlakit, ce yvpvyvkares: vnet estvmvn likvyat, cemeu mvn vpokatskvren.

4 Momen estvmvn ayvyat kerratskes, momet vyetv kerratskes.

5 Pucasē, estvmvn ayetskatt Kerrēkos, momat estomet vyetv kerreye taye haks? Tamvset kicvtes.

6 Vnet vyetv toyit, mehenwv toyit, hesaketv toyis; este estomet Erke oh vtekot omes, *vnen* cv tehooyvne tokon omat.

7 Cv kerratskvten omat, Cv'rkeu kerratskvnt os; momen mucv ayat kerratskes, momet hecatskvtes, Cesvs kicvtes.

8 Pucasē, Erken pu hecievs, momen pum etetayvres, Felvpet kicvtes.

9 Cesvs kicvtes, Felvpē, hofune mahen ece 'pakvkit omvyat, hvte cv kerretskeko munke haks? estimvt cv

hecat Erken hecvtes; moman estomen, Erken pu hecicvs, maketske haks?

10 Vnet Erke vpikin, Erket vc vpikat vkvsvmetskeko haks? Opunvkv es ce tem punayvyat, vntvlket ce tem punayet omvkos, momis Erke vc vpikat, mvt vtotketv momecet os.

11 Vnet Erke vpikin, Erket vc vpikat vm vkvsvmvkes: monkat vtotketv mahusat svrahkvn vm vkvsvmvkes.

12 Mehenwvn, mehenwvn ce kicvkis, Estimvt vc oh vkvsmat, vtotketv momecvyat emeu momecvres, momet vtotketv heyy 'sen rakrvken momecvres, Cv'rken oh ayepikv.

13 Momen naket o estomen cv hocefkv ofvn vpohatskat, mvn momecares, Eppuce ofvn Erket vrvkkvren.

14 Naken cv hocefkv ofvn vpohatsken omat, momecares.

15 Vc vnokecatsket on omat, vm vhakv taken vcayevkes.

16 Momen Erken emekusvpares, momen Emahlpavt etv, ece 'pakkve emunkv taranen ce'mkvres.

17 Puyfekcv mehenwat, ekvny hvlyteko tayat, hecekot omet, kerrekot omckv: momis centake kerratsket os, ece 'pkvket omet, ece 'pikvket omvret ok.

18 Ce mahlpvtketon ce wihkvkos; cem vlvkvkares.

19 Hvtetusat ekvny svnvcomvn cv hecekares, momis centaket cv hecatsket os; hesakvyet omikv, centaken hesahokatskvres.

20 Mv netv omof, vnet Cv'rke vpikin, centaket vc vpikatsken, vnet ece 'pikvkyet omat kerratskvres.

21 Vm vhakv oce, vcayecat, mvt vc vnokecat tes: momen mv vc vnokecat, Cv'rket vnokecen, vnet vnokecet, em-e heckuecares.

22 Pucasè, estomèn pum e heckuecat, ekvny em e

heckuecvranetskeko haks? Cutvse, Eskalevt tokot, kicvtes.

23 Cesvs em vyoposket kicvtes, Este vc vnokecet on omat, vm opunvkvn vcayecvres, momen Cv'rket vnokecen, oh vthoyet, pum vpoketv en hayeyvres.

24 Mv vc vnokecekat, vn uak maketv vcayecekot os; momen opunvkv pohatskat cvnake tokos, momis Erke vc vtovte enaket omes.

25 Heyv nanvke es ce 'tem punayvkvyat, hvte ece 'pakvkvye munkat okvyet os.

26 Momis Emahlvpav, Puyvfekcv Vcakat, Erket cv hocefkv ofv vtovtranat, nanvke omvlkvn ce mvhayet, nanvke ce kicvkvyvte omvlkvn ece 'kerricepuecvkrēs.

27 Herkvn cem wikkis; vn herkvn ce'mvkis; ekvny estemat omēkon ce'mvkit omis. Ce feke cen naorvkates, momet cem penkahlvkates.

28 Ayepit, cem vlvkvikares, ce kicvkvyat pohatskis. Vc vnokecatsket on omat, ece 'fackvke tayes, Erken oh ayis, makikv; Cv'rke vne 'svn rakket omekv.

29 Momen hiyomat cem onayvkit ohmis, hvte eshoyvneko munken, eshoyahnof vkvsmatskvren.

30 Heyv eryupv sulke ce tem punayvkvikares, heyv ekvny em mekkot vlvkranet, vc ofv naken ocekot omekv.

31 Momis Erke vnokecvye tat ekvnt kerrvren, Erke vhakv v'mvte vcvkvye mahusan momecvyet os. Asvpvk-lvks, yvmvn enkpahket, vpeyvkeres.

### SETENTVCKE 15.

VNET prvko-em-vpe mehenwv toyin, Cv'rket vfastvt omes.

2 Elvcce vc ofv ocat ettekat vtekat vkueyet omes; momet elvcce ettat vtekat hysvtecet omes, ohvtvlaken ettvren.

3 Opunkv es ce 'tem punaykvyyte eteropotten hiomat ce hysvthvkvket omes.

4 Vc ofvn fekhonnvkes, vneu ec ofv take *fekhonnin*. Elvcce em vpen vlvce emunket omekot, entvlkat, etteko tayat etvpomen cemeu vc ofvn fekhonnatskekon omat, *ettatskeko tayes*.

5 Vnet pvrko-em-vpe toyin, cemet elvcce *toyatskes*. Estimvt vc ofv fekhonnet on, vneu eme ofv *fekhonnvyet* on omat, matvwvt em ette sulken hayet omes; vnet ece 'pvkvkat naken estomatskeko tayet omekv.

6 Estimvt vc ofvn fekhonnet omekon omat, lvcce omecet wihoken, yuknet omes; momen estet vteloyet, totkvn tvkpvlvtaken, nokret os.

7 Vc ofvn fekhonnatsken, vm opunkvvt ec ofv taken fekhonnet on omat, naken maket, vpohatskis, mvt cem momvkvres.

8 Emette sulken ettakatskaten, heyy ofvn Cv'rke vrakkuehocet omes; momatskofvt vn kerrepvlke toyatskvres.

9 Cv'rke vc vnokecvte etvpomen, vneu ece 'nokecvkvyvtes; vm vnokeckv ofvn fekhonnvkes.

10 Vm vhakvn vcayecatsken omat, vm vnokeckv ofvn fekhonnatskvres: Cv'rke em vhakv vcayecvyyte, em vnokeckv ofv fekhonnvyat etvpomen.

11 Heyv nanvke es ce 'tem punaykvyyat, vm afvcketvt ec ofv taken fekhonnen, cem afvcketv taket esfvckvren okvyis.

12 Ece 'nokecvkvyvte etvpomen, cemeu etenokecatskvret, heyyt vm vhakvt omes.

13 *Este* en hessvlke vrahkv en hesaketv wvkecat, vnokeckv heyy es en rakkat npvt ocekot omes.

14 Nanvke ce kicvkyan momecatsket on omat, vn hessvlke toyatskes.

15 Mucv vtekat vtotkvlken ce kicvkvkos: vtotkvvt e

pucase nake estomat kerrekot omekv; momis *vn* hes-svlken ce kicvkvyet ohmis: nanvke Cv'rke *opunayen* pohvyvte omvlkvn cen kerkuecvkvyvtet omekv.

16 Centat v'nhopoyatskekates, momis vnet ce'nhopoyv-kit, wiketv ce hayvkimvts, vpehyet, emette sulken ettakatskaten, cem ette take oce emunken, nake estomis cv hocefkv ofvn *Cv'rke* em 'pohatskat ce'mvkvren.

17 Heyv nanvke ce kicvkvyet omes, etenokecatskvren.

18 Ekvnt cen homecvken omat, cen *homecvkeko* munket, vne taten *vn* homecvtet omen kerratskes.

19 Ekvnv enake toyatsken omat, ekvnv enaken vnokece tayes, momis ekvnv aenkvpvken ce'nhopoyvkvyat omecicen, monkv ekvnt cen homecet omes.

20 Opunvkv es ce tem punayvkvye, Vtotkv e pucase es en rakkekot omes, makvyvnken ce hohsvkates. Vc assecakvten omat, cemeu ece'ssecvkvrres; vm opunvkvn vcayecakvten omat, cem opunvkv takeu vcayecvkvrres.

21 Momis heyy nanvke omvlkvn cem momecvkvrres, cv hocefkv vrahkvn, mv a'c vtotvten kerrvkekaret ok.

22 Vlahkit, ete'm punayvkvakten omat, holwvyeckv ocvkekvt omes; momis hiyomat holwvyeckv esohrvnkv ocvkekos.

23 Estimvt *vnen* vn homecet on omat, Cv'rken en homecet omes.

24 Vnet vpvkakit, vtotketv este-hunvnwv etv momecvte sekaten momecvkaten omat, holwvyeckv ocvkekvt os; momis hiyomat Cv'rke eshokkoleyam, hokkolvn hecvktet ot, pun homecvkvties.

25 Momis *heyvt momēt os*, opunvkv, Nake omecice sekon *vn* homecakvtes, em vhakv take ofv *make* es hocce ocat esohfvckvren.

26 Momis Emahlypatv, mv Erke aenkvpvkei a cen

'totvranvkvyat, Puyfekcv mehenwat, mv Erke aenkv-pakat vlakof, vc ohkerkuecvres:

27 Momen cemeu ohkerkuecatskvres, enhvteceskv vteke vc vpakatskvtet okv,

### SETENTVCKE 16.

Ce'LENTAPPUEHOCHKEKAREN heyy nanvke es ce 'tem punayvket ohmis.

2 Senekake take a 'sec ossicvkvres, momes, hvse-vkerkv vlvkvres, mv ce 'lecvkat vtekat, Hesaketvmese em vtotketvn momecet omis, komvres.

3 Heyv nanvke cem momecvkvres, Erke, momen vneu kerryte sekot omakekv.

4 Momis heyy nanvke cem onahyvkis, mv hvse-vkerkv vlakof, cem onayvkvyvte vkerricatskvren. Momis enhvteceskv heyy nanvken ce kicvkvkomvts, ece 'pakvkikv.

5 Momis hiyomat mv a'c vtotvten oh ayis, momen hvmkatskis, Estvmvn ayetska? cv kicatskekosa.

6 Momis heyy nanvke ce kihcvkikv, feknokketvt ce feken cen fvcfakvk's.

7 Mome estomis, mehenwvn cem onayvkis: vyepvyate min es cem vmmomvkes; ayvkon omat, Mahlypatv cem vlahkvkekot okv; momis ayepin omat, a cen 'totvkares.

8 Momen emet vlakof, naorketv, fvccetv, momet ohfvceckv ekvnvn ohkerricvres.

9 Naorketv *ohkerricvres*, vc oh vksvsmvkekokv.

10 Fvccetv *ohkerricvres*, Cv'rken oh ayepin, cv hecatskekaret okv.

11 Ohfvceckv *ohkerricvres*, heyy ekvnv em mekkot ohfvceekv.

12 Nanvke ce kicvranykvyat sulken ocye munket omis, hiyomat kvwvpatskeko tayes.

13 Mome estomis, Puyfekcv mehenwat, emet vlakof,

mehenwv omvlkvn 'seceyvkres; entvlket opunayekaret okv; momis naken pohat, mvn opunayvres: momet nanvke vlvkvranañ ce hecicvkres.

14 Emet vc vrakkuecvres; cvnake aossat en hecken, mvn ce hecicvkret okv.

15 Nanvke Erke ocat omvlkvt cvnaket's; momet okv, Cvnake aossan elset, ce hecicvkres, makit okvyis.

16 Hvtetusat cv hecatskekares; momen hvtvm hvtetusat cv hecatskvres, Erken oh ayepikv.

17 Hvtetusat cv hecatskekares: momen hvtvm hvtetusat cv hecatskvres; momen Erken oh ayepikv, heyy makat, naken pu kicet oke haks? en kerrepvlke *vpvlwvt* ete kicakvtes.

18 Momekv heyy, Hvtetuse, makat, naken *maket* oke haks? Naken maket okat kerrēkos, makakvtes.

19 Momen em 'pohetv eyacvket on Cesvs kerret, kicakvtes, Hvtetusat cv hecatskekares; momen hvtvm hvte-tusat cv hecatskvres, makvyan, etempohatske haks?

20 Mehenwvn, mehenwvn ce kicvkis, Wahoket, hvkih-hokatskvres, momis ekvnv afvckvres: momen ce feke *cen* nokhokvkres, momis ce feke *cen* nokhokvkvt afvc-ketv hakvres.

21 Hokte hopuevw heckuecvranat en nokket em vlakof, feknokket omes, en hvse-vkerkvt vlakekv: momis hopuevw en heckat vpaken, nokke eholes, estet ekvnvn heckan es vfackekv.

22 Momen centake momet okv ce feknokhokvkes, hiomat; momis hvtvm ce hecvkares, momen cc feke take afvckvres, momen cem afvcketv este estomet ce 'konvh-hvkekos.

23 Momen mv nettv omof naken vm 'pohatskekares. Mehenwvn, mehenwvn ce kicvkis, Nake estomen ev hocefkv ofvn Erke em 'pohatsken omat, cc'mvkres.

24 Naken cv hocefkv ofv vpohatskekon hiyomat oret os : vpohvks, momen cen heckvkvres, cem afveketv take esfvckvren.

25 Heyv nanvke opvnkv-svhopakvn es ce tempunayvkit ohkis ; momis oketvt vlvkvres, svnveomv opunvkv-svhopakv es ce 'tempunayvkvet, momis Erke kēkusen ce hecicvranskvyat.

26 Mv nettv omof cv hocefkv ofvn vpohatskvres : momen, Erken cem emekvsvpvkares, ce kicvkit okvkos :

27 Erke eme mahusat tis ece 'nokecvket ok, vc vnokecet, Hesaketvmesen aenkvpvket vtvyte tat vkvsvmatskv-tet okv.

28 Erken aenkvpahkit, yvmv ekvnvn vlvkvyet os : momet hvtvm.ekvnv wihibit, Erken oh ayis.

29 *Momen*, Hecvs, hiyomat kēkusen opunayet, opunvkv-svhopakv tokon opunayetskes.

30 Hiyomat nanvke omvlkvñ kerretske tat, momen este estomet cem 'pohekar tayet omen mucv mehenwvn kerres ; Hesaketvmese aenkvpvketeskten heyvn es vksamēs, en kerrepvlket kicakytes.

31 Cesvs em vyoposket, *kicvtes*, Hiyomat vksamatska ?

32 Hecvkes, este enake vlken *oh ayet*, vwahvranatskat hvse-vkerkv vlakes, momes, hiyomat vlvkes, momet vntvlken cv wiktatkres : montomis vntvlkek's, Erket vc vpket okv.

33 Heyv nanvke ce 'tempunayvkvyat, vne ofvn herkv ocatskvren okvyet os. Ekvvnvn estemerkv ocatskvres ; momis ce mahlvpvtkvket omekvs ; ekvnv ohfvnkvyvtet os.

### SETENTVCKE 17.

HEYV opunkvn Cesvs opunahyof, e turwvn hvlwen vkwahpet, makvtes, *Cv'rkē*, hvse-vkerkv vlvkes : Ce'p-pucen vrakkuecvs, Ce'ppuceu ece 'rakkuecuren :

2 Nvcomen emetskvte on omat, hesaketv yuksv-sekdn emē tetayen enavpeswv omvlkv ohfvnken yekcetvn emetskvte etvpomen.

3 Momen, Hesaketvmese mehenwv hvmkusetskan ce kerret, momet Cesvs Klist mv vtotetskvten *kerrat*, heyyt hesaketv yuksv-sekat tes.

4 Ekvvn v ec oh vrakkuecvyvtet omes; vtotketv momecv-ranvye v'metskvte poyis.

5 Momen, Aeha *Cv'rkē*, hiyomat ceme mahusan 'svc vrakkuecvs, ekvvn seko emunke rakketv ece 'pake ocv-ytten.

6 Este ekvvn asosse v'metskvte ce hocefkv en kerkue-cakvyttes: cenake tates, momen mvn v'metskvtes; momen cem opunvkvn vcayecvkvttet omes.

7 Hiyomat nanvke omvlkv naket o estomis v'metskvte a ce'nkvpvkvttet on kerrvkvttet omes.

8 Opunvkv v'metskvte e'makvyttet omekv: momen cenakuecvyvtet omet, a ce'nkvpakvyvtet omen mehenwvn kerret, a'e vtotetskvttet omat vkvsvmvkvttet omes.

9 Em emekusvpakis; ekvvn em emekusvpvkvkos, momis v'metskvten; cenaket omakekv.

10 Momen cvnakē omvlkv cenaket's, momen cenake cvnaket's; momen emetake ofvn vc vrakket omes.

11 Momen hiyomat vnvcomvn ekvvn arvkos, momis heyyt ekvvn fulles, momen a ec oh atis. *Cv'rkē* vac-ketskat, ce hocefkv eteropotten mv v'mvketskvte vcvye-cvkvs, pume omēt hvmkusvren.

12 Ekvvn ofv vpvkakvyof, ce hocefkv ofvn vcayecvkv-yttes: mv v'mvketskvte vcayecvkvyyttes, momen hvmkis sumkekos, suuketv e'ppuce tvlket, Cokat esohfvckvren.

13 Momen hiyomat a ec oh atis: momet heyy nanvke ekvvn opunayis, emetake ofvn vm afvcketvn esfvcken ocvkvren.

14 Cem opunvkv e'makvyvtes: momen ekvnvt en homecvkvtes, ekvnv enanvke tokok, vnet ekvnv enake toyvkat etvpomen.

15 Ekvnv esossicetskvren emekusapit omvkos, momis holwakan enkvpvyecicetskvren.

16 Ekvnv enake tokot omakes, vne ekvnv enake toyvkat etvpomen.

17 Cem mehenwv eteropotten vcacvken hvyvs: cem opunvkvt mehenwv tes.

18 Cemet ekvnv a'c vtotetskvte etvpomen, vneu ekvnvn vtotvkvyet os.

19 Momen emetake vrahkvn vcaken e hayvyet os, mehenwv eteropotten emeu vcacvke hakvren.

20 Momet heyy tvlken em emekusapit omvkos, momis em opunvkv eteropotte vc oh vksvsmvkvranateu;

21 Entake omvlkvt hvmkusvren; cemet, *Cv'rkē*, vc vpiketsken, vne ece 'pikvyat etvpomen, entakeu ep'ofvn hvmkusvren: a'c vtotetskvten ekvnvt vksvsmvren.

22 Momen rakketv v'metskvte e'makvyvtes, hvmkuseyat etvpomet hvmkusvren;

23 Vpikakin, vc vpiketsken, hvmkuse etemvpoke hakvren, momen a'c vtotetskvte tat, momet vc vnokecetskvte etvpomen vnokecvketskvttet omat ekvnvt kerrvren.

24 *Cv'rkē*, mv v'mvketskvte estvmvn likvyat vc vpakvren komis, rakketv v'metskvte hecvkepvren; ekvnv hakko munken vc vnokecetskvttet omekv.

25 *Cv'rke* faccetskat, ekvnvt ce kerrekates, momis ce kerrvyvtes, momen heyyt a'c vtotetskvte tat kerrvktet ones.

26 Momen ce hocefkvn en kerkuecvkvyvtes, momet kerkuecares, mv vnokeckv es vc vnokecetskvttet vpikan, vnet vpikakaren.

## SETENTVCKE 18.

HEYV opunvkvn Cesvs opunahyof, en kerrepvlke vpaket ayet, Ketlvn hvccucen tikvtes; mvn cvpofucet ocet on, eme en kerrepvlke esyont esceyvtes.

2 Momen Cutvse mv wiyyat mv cvpofuce kerre tates, Cesvs en kerrepvlken vpaket mvn etohkvlke mahet omvet tet okv.

3 Momen Cutvse, *suletaww* etohkvlke hvmken, momet este-en-wiketvn, plest enhomvhhotvt, momet Falvsevlket en heckuecof, kulken, eto-kulecvkvten, momet setepokv ocvken, 'res orvtes.

4 Cesvs, nanvke eme oh vlvkvranaat omvlkvn kerret, oh ayet, Estimvn hopoyatska? kicakvtes.

5 Em vyoposket, Cesvs, Nasvlvlkē, *kicakvtes*. Vnet *mv* toyis, Cesvs kicakvtes. Momen Cutvseu, Cesvs wiyyat vpvkaket huervtes.

6 Momen, Vnet *mv* toyis, kicakat vpakusen, vcekelleh-cet, ekvnvn tvkpvlatkvtes.

7 Momen hvtvm em 'pohakat, Estimvn hopoyatske haks? *kicvtes*. Momen, Cesvs, Nasvlvlkē, makavtes.

8 Cesvs em vyoposket, Vnet *mv* toyvyat cem onahyv-kis; momekv cv hopoyatsken omat, heyvt vpeyepekvs, *makvtes*:

9 Mv v'metskyte hvmkis vn sumkekos, make eme opunayat esohfvckvren.

10 Momof Simv Petvt, eslafkv-cvpkon ocet ot, a esvtes, momet plest enhomahtv. hvlwat em vtotkv hvmken e hvcko vkpervn *en tacvtes*. Vtotkv e hocefkv Malkvs tates.

11 Cem eslafkv-cvpkon e huten vpikvs: sesketv Cv'rke v'mvte es eskvranvko haks? Cesvs Petvn *kicvtes*.

12 Momof kvpetvne, *suletawvlke* etohkvlke hvmket, momen Cusvlke este-en-wiketv esyomat, Cesvs esahket, wvhayakvtes,

13 Momet Auvse taten 'soh vpeyvtes, Kiefvse em mahet omekv, *Kiefvset* mv ohrolopen plest enhomahtv hylwat omen.

14 Momen, Kiefvset, Este-hunvnwv hvmket este em ele tayet ome omechet, Cusvlken 'semvhayat omvtes.

15 Momen Simv Petvt Cesvs vcvkarvtes; momen en kerrepv etvt. Mv enkerrepv plest enhomahtv hylwat kerre tates, momen Cesvs vpaket plest enhomahtv hylwat en cuko-herv eceyvtes.

16 Momis Petvt fettvn vhauken vhuervtes, momen mv enkerrepv hvmkat plest enhomahtv hylwat kerrat, ossvtes, momet hokte *mvnette* vhauke vhecican em punahyet, Petvn a ceyicvtes.

17 Momof mv hokte *mvnette* vhauke vhecicatet, Cemeu heyy hunvnwv en kerrepvlke *hvmkat* toyetskeko haks? Petvn kievtes. *Mv* toyvks, makvtes.

18 Momen vtotkvlke momen este-en-wiketv, kvsvppet okv, torawvn etecct, vsvpvklvtes, tvrraket: momen Petv mvn vpaket tarret, huervtes.

19 Momof plest enhomahtv hylwat Cesvs, em *mvhakvn*, momet en kerrepvlken em vpohvtes.

20 Cesvs em vyoposket, Ekvnv kerknsen em punayvvties; senekake ofvn, momet cuko-vcakat ofvn, mv Cusvlke estofis nvkaftan, *mvhayvye* munkvts; momet ehkuse naken makvyvte sekos.

21 Estoman vm 'pohetske haks? vm vpohicakvten em 'pohvs, naken kicakvyvte; hecvs, nake makvyvte *kerrakes, kicvtes*.

22 Momen hiyome opunahyof, este-en-wiketv vnakv svpaklat hvmket enke-tvpeksen Cesvs es nafkvtes, Plest enhomahtv hylwat momen em vyoposketske haks? makvet.

23 Cesvs em vyoposket, Holvvken opunayin omat, hol-

wakan akerkuecvs: momis heren omat, estoman ev naf-ketske haks? *kicvtes*.

24 Momen Anvset *Cesvs wvnken* Kiefvse plest enhomahtv hvlwan ohtotet omvtes.

25 Momen Simv Petvt tarret, huervtes. Monkv Cemen en kerrepvlke *hvmkat* toyetskeko haks? kicakvtes. Momen ehelaksecet, *Mv* toyvks, makvtes.

26 Plest enhomahtv hvlwat em vtotkvlke hvmket, e hvcko Petv en tacvte en naket omet, Vpketsken cvpofuce osv ce hecvkt haks? kicvtes.

27 Monkv Petv htvm ehelaksecvtes; momen moman vpakusen tottoloset hakvtes.

28 Momof Kiefvse enkvpvken *Cesvs fvccckv-cukon* 'soh vpeyytes; momen htten tates; momen emetake fvccckv-cuko esceyekates, svholwvhokekot, momis ohhooyv<sub>n</sub>kv *hompetv* hompvkepvret.

29 Momekv Pilvtet osiyet, oh vyakvtes, momet, Vnrvpueckv estomen hayv este-hunvnuwv vnrvpe es yicatske haks? makvtes.

30 Vhakv-kacv tokon omat, ye een huericēkvnt os, em vyoposket kicakvtes.

31 Centake ehset, cem vhakv take vcvkvyen ohfvcccvks, Pilvtet kicakvtes. Momekv, Este eleceyvre vhakv tok's, Cusvlket kicakvtes:

32 Cesvs em opunvkv, elkv estomēn elvranat kerkuecet makat, esohfvckvren.

33 Momof Pilvtet fvccckv-cukon htvm ceyet, Cesvs enhuehket, Cusvlke em Mekko toyetska? kicvtes

34 Heyv nake ceme mahusat maket oketske haks? monkat etimvt vc opunvyecet cem onahoye haks? Cesvs em vyoposket *kicvtes*.

35 Pilvte vyoposket, Cusvlke toyvya? Cem etvlwv,

momen plest en homvhhotvt yc ce huericaket os; naken estometska? kicvtes.

36 Cesvs vyoposket, Vm ohmekketv ekvny enake tokot omes. Vm ohmekketv ekvny enaket on omat, vm vtot-kvlke tepoyakēs, Cusvlket cv 'sekaren; momis hiyomat vm ohmekketv yvmv vtē tokot omes, kicvtes.

37 Momekv mekko toyetska? Pilvtet momof kicvtes. Cesvs vyoposket, Mekko toyvyat, maketskes; heyy 'svrahkvn cv heckvtet omes, momet heyy omeccicen ekvny vlvkvyvtet omes, mehenwv akerkuecaret. Mehenwv enake vtekat vm opunvkv en hake vpohicet omes, makvtes.

38 Naket mehenwvt o haks? Pilvtet kicvtes. Momet heyy mahkof, hvtvm osiyet, Cusvlken oh ayet, Naket em mvtte tat eshecvkos, kicakvtes.

39 Momis es cem vpeyetvn ocatsket os, ohhoynkv omof hv̄mken cem enrecopykaren. Momekv Cusvlke em Mekkon cem enrecopykaren komatske haks? kicvtes.

40 Momof omvlkt hvtvm huehkaket, Heyv hunvnwv tokon, momis Pvlapvsē, makakvtes. Momen Pvlapvse svpenkylecvt omvtes.

### SETENTVCKE 19.

**МОМЕКВ** momof Pilvtet, Cesvs ehset, tepkvtes.

2 Momen suletawvlket, eto-fvske kvpotokvn hotanet ekvn em oh licakvtes, momet kapv okholatten vcceca-kvtes.

3 Momet, Cusvlke em Mekko toyetskate! maket, e'nken es nvfkakvtes.

4 Momekv, Pilvte hvtvm aosiyet, Hecvks, a's cem ossvikis, nake em mvtte hv̄mkusis eshecvkat kerratskvren, kicakvtes.

5 Momof Cesvs, eto-fvske kvpotokvn es kvtopoyet,

momet kapv okholatten accet, aossvtes. Momen *Pilvtet*  
Este-hunvnwvn hetvks, kicakvtes.

6 Monkv plest enhomvhhotvt, momen este-en-wiketv  
hecakof, huehkaket, Etohweklepkvn svrvhvs, etohwek-  
lepkvn svrvhvs, makakvtes. Pilvtet, Centaket ehset, etoh-  
weklepkvn svrvhvks; vne em mvttē eshecvkot omekv,  
kicakvtes.

7 Cusvlket em vyoposkaket, Vhakvn ocēs, momen pum  
vhakv vcvkvyen ele tayet omes, Hesaketvmese E'ppuce  
e hayet omekv, *makakvtes*.

8 Momekv Pilvtet, mv opunvkvn pohof, svheremahen  
penkalvtes :

9 Momet, hvtvm fvcceckv-cukon cehyet, Estvmvn atets-  
ka? Cesvn kicvtes. Momis Cesvs em vyoposkekates.

10 Momekv Pilvtet, Vm punayetskeko haks? Etohwek-  
lepkvn 'sece 'rvhetv yekcetv ocit, ce'nrecopetv yekcetv  
ocvyat, kerretskeko haks? kicvtes.

11 Cesvs vyoposket, Vc vnrvpe yekcetv ocetskeko  
tayes, hvlwe vten ce'mhoyekon omat; monkv ce homv  
cv huericat svhere mahen naorket os; *makvtes*.

12 Momen mv vteken, Pilvtet enrecopetvn ohvtvlaken  
komvtes: momis Cusvlke huehkaket, Heyv hunvnwvn  
enrecopetsken omat, Sesv en hesse toyetskekos; estimvt  
mekkon e hayat Sesv vnrvpet opunayet omekv, maka-  
kvtes.

13 Momekv mv opunvkvn pohof, Cesvs es ossvtes,  
momet fvcceckv ohliketvn oh likvtes, Cvto-pvtihocvte  
kihocan, momis Hepluvlke em punkv Kvparvt's.

14 Momen ohhoynkv etetakueckvt omen, hvse-vkerkv  
esepakat mahe tates. Momen Pilvtet, Cem Mekkon  
hecvks! Cusvlken kicakvtes.

15 Momis huehkaket, Esvyepvs, esvyepvs, etohweklep-  
kvn svrvhvs, etohweklepkvn svrvhvs, makakvtes. Pilvtet,

Cem Mekkon etohweklepkvn svrahvrami haks? kicakvtes. Plest enhomvhhotvt vyoposket, Mekko ocēkos, Sesvt *mv* tokon omat, *makavtes*.

16 Momof em wikkvtes, monkv, etohweklepkvn svrahkvren. Momen Cesvs ehset, 'svpeyvtes.

17 Momen osiyet, em etohweklepkvn karonet, Estekv-fune kicetvn oh ayvtes, Hepluvlke em punvkv Kalkorvt's:

18 Mvn etohweklepkvn svrvhakvtes, momet etv hokkolet vpaken, hvmkevlket etempalvsen, momen Cesvs en nvrkvpvn.

19 Momen Pilvtet eshocefat hoccihcet, etohweklepkvn svlicvtes. Momen hoccat, CESVS NASVLVLKE, CUSVLKE EM MEKKO, *maket* omvtes.

20 Momekv heyy eshocefat Cusvlke sulket hecakvtes, Cesvs etohweklepkv svrahohat tvlofv em vwoluset omekv; momen Hepluvlke, Kleklke, Lomvlke esyomat em punvkv hoccet omvtes.

21 Momof Cusvlke, plest enhomvhhotvt, Cusvlke em Mekko makekon, momis, Cusvlke em Mekko toyis, makvtes, *maken coyvs*, Pilvten kicakvtes.

22 Pilvte vyoposket, Nake hoccicyat hoccicit ohmis, *makvtes*.

23 Momof suletawvlket, Cesvs etohweklepkv svrvhahkof, em accvken cvwaket, tekvpvke osten hayakvtes, suletawv esvrahkvn tekvpvke hvmkevlken: momet kapvn *cvwakvtes*; momen kapv etehorkv sekot, onvpv hvmkv yeshvatket tarket omvtes.

24 Momekv, Selahlecēkot, momis estimvt omvre esker-rvkeres, etc kicakvtes; Vm accvke etekvpicet, vn kapv estit omvre eskerrakvnes, Cokv makat sohfvckvren. Momekv heyy nanvke *mahušan* suletawvlket momeca-kvtes.

25 Momen Cesvs e'cke, momen e'cke etecakkat, Mele

Tleofvse e *hiwv*, momen Mele Maktelv esyomat *Cesvs* em etohweklepkv tempen svpaklvtes.

26 Momekv Cesvs, e'cke momen enkerrepv Cesvs vnokecat v hueren hecof, Hoktē, ce'chuswvn hecvs ! e'cken kicvtes.

27 Momof enkerrepvn, Ce'cken hecvs ! kicvtes. Momen mv hvse-vkerkv vteken mv enkerrepvt evpayet, e *huten likvren* sayvtes.

28 Heyv eryupvn, Cesvs, nanvke omvlkv hiyomat esyukpokat kerrekv, Cv wvhkkes, makvtes, Cokat esfvckvren.

29 Momekv uetukse vcvnkv fveket es likvtes ; momen uepvton uetuksen fvcehcet, momet hesvpen oh licet, e cukwvn em vcelicakvtes.

30 Momekv Cesvs, uetukse en hecikof, Esyukpokes, makvtes : momet e'kvn potoyicet, puyvfekcvn wikvtes.

31 Cusvlket monkv, tetakueckvt omen, ena pvsatkat etohweklepkvn oh vtvrtake munkekaren, (mv fekvpkv nettv nettv rakket omekv,) ele kvcehken, *ena* vkuehoyyren Pilvten em 'pohakvtes.

32 Momof suletawvlke yihcet, enhvteceskv *vtarkan* elen en kvcehyet, hymkateu vpake etohweklepkv svrahkat *ele* en kvceyvakvtes.

33 Momis Cesvs en yicen, entis elepvtet on hecakof, elen en kvceyvkekates.

34 Momis suletawv hvmket cufunfsken envcen 'sen sekeyvtes, momen moman vpaken uevv catv esyomet a fihnvtes.

35 Momen mv hecvte ohkerkueces, momen em ohkerkueckv mehenwe tes ; momen mehenwvn opunayat kerret omes, vkvksamatskvren. .

36 E fune hvmkasis kvckekares, Cokv makat, esohfvckvren, heyyv nanyken momechoyvtet okv.

37 Momen, Mv sekeyakan hecvkvres, maket, hvtvm etvt coket omes.

38 Heyv 'renyupvn, Cose Alemetvlket, Cesvs enkerrepvt omen, momis ehken, Cusvlke em penkalat omeccicen, Cesvs e'na vkueyvret Pilvten em 'pohvtes; momen Pilvet *em* vkvsamvtes. Momekv vlahket, Cesvs e'nan 'sayvtes.

39 Momen Nekotemvseu, (mv enhvteceskv nere Cesvs em vlakvtet,) smvnv, alo tohkvle vtarkv cukpe hvmkat mahan 'svlakvtes.

40 Momekv Cesvs e'nan esaket, hvnvwelv tvrken, esfvmecicky vpvken es vpvlvyakytes, Cusvlke en herickv vcvkvyen.

41 Momen etohweklepkv svrahkan cvpofuce tates, momen cvpofuce ofvn sepvlkv mucvse este wvkechoyvte sekot ocvtes.

42 Momekv mvn Cesvs wvkecakytes, Cusvlke *e* eteta-kueckv *nettvt* em ocet on, momen sepvlkv vwoluset omekv.

#### SETENTVCKE 20.

NETTYOAKUCÉ nettv enhvteceskv, hvten, yomuckuse emunken, Mele Maktelv sepvlkvnl vlaket, cvto sepvlkv vkueyihocen hecvtes.

2 Monkv letket, Simv Petvn, momet enkerrepv etv, Cesvs vnokecan em vlaket, Pucasen sepvlkvnl aossicet vkueyihoces, momet estvmvn wvkechoyat kerēkos, kicakytes.

3 Momekv Petvt enkerrepv hvmkeu tepaket wolket, sepvlkvnl vlahokvtes.

4 Momof hokkolvt etepvket tokorken, enkerrepv hvmkat, Petv letkat emuntalet, en homvn sepvlkvnl 'rorvtes.

5 Momet, ohcunehket, hvnvwelv tvrke accvke tvk kaken hecvtes, momis ceyekates.

6 Momof Simv Petvt vcvkayet, vlakvtes, momet sepvlkvn cehyet, hvnvwelv tvrke accvke tvk kaken hecvtes.

7 Momet, enockuce ekv vpvlakvte hvnvwelv tvrke accvke vpakekot, momis tulpuket entvlket etin kaken *hecvtes*.

8 Momekv momof mv̄ enkerrepv hvmkat, mv̄ tate sepvlkv 'rorat, ecehyet, hecvtes, momet vkvsamvtes.

9 Cokv, Pvsatkan a en kvwvpkvrinet os, makat hvte kerrykekokv.

10 Momof enkerrepvlket hvtm̄ e hute taken vhoyvtes.

11 Momis Melet hvkihkvet, sepvlkvn fettvn v huervtes; momet hvkihkf, ohcunehket, sepvlkv ofvn *vfvnnakvtes*,

12 Momet encelvle hokkolet, hvtke accvket, Cesvs e'na wakkvten kaken, hvmket ekv likvtēn liken, hvmkatet ele kakvten liken hecvtes.

13 Momen, Hoktē, Estomen hvkihketska? kicaken, Cv Pucasen vkueyihocen, estvmvn wvkechoyaten kerrykat omeccices, kicavtes.

14 Momen hiyomen opunahyof, fulotkat, Cesvs hueren hecvtes, momis Cesvs tat kerrekates.

15 Hoktē, estomen hvkihketska? Estimvn hopoyetska? Cesvs kicen; emet, Cvpofuce vfastv tes, komet, Pucasē, cemet etimvn 'sayetskvtē omat, estvmvn wvkecetskat. vm̄ onayetsken, vkueyares, kicvtes.

16 Cesvs, Melē, kicen, a oh fulotiket, Laponi, kicvtes, mvt Mvhayv maketvt's.

17 Cv celahyetskvs, hvte Cv'rke vkwvpkvikot emunkekv; momis vm̄ etecakketvlken oh vyvs, momet Cv'rken, Ce'rke take, momet vn Hesaketvmesen, cen Hesaketvmesen take vkwvpkvyan, em onvyvks.

18 Mele Maktelv vlaket, Pucasen hecwyis, momen heyy nanvken es cv tempunayis, en kerrepvlken kicavtes.

19 Momen mv̄ nettv etvwvn, nettv cakuce *nettv* enhv-

teceskvt omen, yafkof, enkerrepvlke, Cusvlke em penkv-lvket, vhauke vkhoothoken, nvkaften, Cesvs vlakytes, momet, nvrkvpvn hueret, Herkvt cem ocvkekvs, kicakvtes.

20 Momet, hiyomen punahyof, enken, e'nvcen tepaket hecvkuecvtes. Momekv enkerrepvlket, Pucasen hecakan, afvckakvtes.

21 Momof hvtvm, Herkvt cem ocvkekvs: *Cv'rke vc vtovte etvpomen ece 'totvkis*, Cesvs kicakvtes.

22 Momet heyy mahkof, oh hesaket, Puyvfekcv Vcakat cen heckvkekvs, kicakvtes.

23 Estimv en naorketv es em wikatskat, es em wikaket omes, momet estimv en *naorketv vfekhonniscatskat*, vfek-honnaket omes.

24 Momis Tamvse, Tetemvse kihocat, pale hokkolohkat hvmkatet vpvkkekcon, Cesvs vlaket omvtes.

25 Momekv enkerrepvlke vpvlaket, Pucasen heceyvnks, kicakvtes. Momis, E'nken vcopv svrahkvten hecit, vcopv svrahkvten cv'nkewesakvn vpikvkon omat, momet e'nvcen cv'nken vpikvkon omat, vkvsahmvkos, Tamvset kicakvtes.

26 Momen nettv cenvpake renyupvn hvtvm enkerrepvlket ofvn vpoken, Tamvseu vpvkakvtes: Cesvs vlaket, vhauke vkhoothokepen, nvrkvpvn hueret, Herkvt cem ocvkekvs, makvtes.

27 Momet Tamvsen, Ce'nkewesakvn rvtosecet, cv'nken hecvkvs: momet, ce'nken rvtosecet, cv'nvcen vpikvs: momet vkvsymkv ocekot huyiretskvs, momis vkvsymet, kicvtes.

28 Momen Tamvse em vyoposket, Cv Pucase, momet vn Hesaketvmesē, kicvtes.

29 Tamvsē, cv hecetskekv, vkvsahmetskes: hecvkekis, vkvsymakvte en herakes, Cesvs kicvtes.

30 Momen mehenwvn, nakeskerkv etv sulke, heyy nak-

cokv ofv hoccvkekcat, Cesvs momecakvtes, en kerrepvlke en renakv ehomvn.

31 Momis, Cesvs, Klist tot, Hesaketvmese E'ppuce tat vkvsvmatskvren, momet vkvsamet, e hocefkv eteropotten hesaketv ocatskvren, heyy nanvke coket os.

### SETENTVCKE 21.

HEYV nanvke renyupv, Cesvs hvtvm enkerrepvlken em e heckuecvtes, vkhvse Tipelevs *hocefkan*: momet hiymen em e heckuecvtes.

2 Simv Petvt, Tamvse Tetemvse hocefkat, Neranevl, Kalvle *ekvvv*, Kenv *tvlofv* aossat, Sepete e'ppuce *take*, moinen en kerrepvlke etv hokkole etohkvlkvtes.

3 Momen Simv Petvt, Rvropokvn ayis, kicaken, Pumeu ece 'cvkvpēyēs, kicakvtes. Asosiyet, lvpken perro-cukon resceyvtes; momet mv veren naken esvkekates.

4 Momen hvytikof, Cesvs lvpvtken huervtes: momis enkerrepvlke Cesvs tat kerrykekates.

5 Momof, Hopuetakē, hompetvn ocatske haks? kicaken, Monkos, em vyoposket kicakvtes.

6 Momen, Perro-cuko em vkvpervn hoyv vk wikkvks, momet eshecatskvres, kicakvtes. Momekv vk wikkakvtes, momet momof, rvro sulke mahat omecicen, asossiceko tayvtes.

7 Momekv enkerrepv Cesvs vnokecat, Pucase tes, Petvn kicvtes. Momen Petvt Pucaset omaten pohof, (enatvlket omekv,) rvro-pooyv en kapvn vciyet, e wvnahket, vkhvsen e vk wikkvtes.

8 Momis enkerrepvlke vpvlwvt, perro-cuko cotken vtehket, es yicvtes; (lvpvtke en hopvyekot, kupetv cukpe hokkolvteke en hopvyet omekv,) hoyv rvron es vk sopoteckakvtes.

9 Momet lvpvtken es yicat vpakusen, totkv-torawvn hecakvtes, rvrot oh ocen, momen tvklike.

10 Rvro hvte poyatskat es vvvkes, Cesvs kicakvtes.

11 *Momen* Simv Petvt ahyet, hoyv rvro rakrvke fvcken, lvpvtken 'res vceayvtes, cukpe hvmken pale cahkepen tutcenohkaken: mómen, en sulke momis, hoyv vhopvnkekates.

12 Ahwet, hompvks, Cesvs kicakvtes. Momen enkerrepvlke hvinkis, Esti toyetska? kice em 'pohetvn eyacyekates, Pucaset on kerrakekv.

13 Momof Cesvs vlaket, tvklichen ehset, e'makvtes, rvro matvpomen.

14 Momen Cesvs pvsatkat a en kvwwpkvte renyupv enkerrepvlke em e heckuecat, heyvt 'svtutcenat tes.

15 Momekv hompahkof, Simv, Convse e'ppucē, Heyv 'sen hoyvnen vc vnokecetske haks? Cesvs Simv Petvn kicen, Petvt, Henka, Pucasē, ece 'nokecvyat kerretskes, kicvtes. Vn yvpefikucen hompvkuecvs, Cesvs kicvtes.

16 Hvtvm svhokkolvn, Simv, Convse e'ppucē, vc vnokecetske haks? kicen, Henka, Pucasē, ece 'nokecvyat kerretskes, kicvtes. Vn yvpefikvn hompvkuecvs, Cesvs kicvtes.

17 Svtutcenvn, Simv, Convse e'ppucē, vc vnokecetske haks? kicen, Petvt, Vc vnokecetske haks? svtutcenvn kicekv, e feke. en nokket, Pucasē, nak omvlkvvn kerretskes; ece 'nokecvyat kerrusetskes, kicvtes. Cesvs kicvtes, Vn yvpefikvn hompvkuecvs.

18 Mehenwvn, inhenwvn ce kicis, Ce mvnettusof, e wvnaket, estvmvn kometskat yvkapetskvties; momis ece 'cule hakof, ce'nken rvtosecetsken, este etvt ce wvnayvres, momet estvmvn kometskekcat sece 'yvres.

19 Elkv estomēn Hesaketvīmesc 'svrakkuecvranat oket,

heyvn makvtes. Momen hiyomen opunahyof, Vc vcvkvyvs, kicvtes.

20 Momof Petvt afolotkat, mv enkerrepv Cesvs vnokecat, mv, hompakof, Cesvs e hokpen vccaket, Pucasē, mv ce wiyyat, estit o haks? makvte, vcvkayen hecvtes,

21 Monkv Petvt mvn hecet, Pucasē, momen heyv este-hunvnwv naken *estomvr* haks? Cesvn kicvtes.

22 Fekhonne munken vlvkaret komin omat, mvt cem estoma? cemet vc vcvkvyvs, Cesvs kicvtes.

23 Momekv heyv opunvkv, Mv enkerrepv elekares, makat, etecakkvte em etenrvwn pohkvtes. Momis Cesvs, Elekares, makekot, momis, Fekhonne munken vlvkaret komin omat, mvt cem estoma? makvtes.

24 Heyvt mv enkerrepv tes, heyv nanvken kerkuecet, heyv nanvken hoccicat; momen em ohkerkueckv mehen-wet on kerrēs.

25 Momen nanvke etv sulket ocakes, Cesvs momecakvtet, momat, momecakvte vtekat cohoyen omat, nakcokv cohoyat ekvny tis facke hoyvne tayes, komis. Emen.